


CIIBI MUNDA MWÀ CIIBI

 Twasakidila wàbûngì, mwaneetu wa balume, Mwaneetu Tony, ne kùdi balunda bônso, beena lwendu bényi, bényi! Nudi bamanye's, twètù katwena tudyamba mutùdi... Mfwilaayiku luse.

² [Mwaneetu wa balume kampana ku cyambilu ùdi ufila mulubu pa mushindu wùvwà Nzambi mwandamune disambila dya Mwaneetu Branham kùkaadi bidimu bisatu mu Tulsa, mu Oklahoma, ne mwàkasungidiibwà misuuka yàbûngì mu mudimu wende wa bwambi mu Brésil ciine cidimu aci—Muf.]

³ Nzambi akubeneshe, mwaneetu. Ntu—ntu munange kuumvwa milubu ayi ya pàdi misuuka yisungidiibwa, nudi bamanye's. Ki cintu cya—cya mushinga ncyôci aci. Nenku tudi ne disanka bwa kwikala kaaba aka ne kumonaku balunda beetu bààbûngì bàdi bafumine ku bitupa bishiileshilangane bya ditunga. Ne mwaneetu wa balume ewu mmulwe mpindyewu mu cimenga eci, mûndi muumvwe bàmba, mu dinda emu, ne bintu byende byônso bya mudimu bikaadi bimana kutuulula ku mashinyi kaaba aka bwa—bwa ditabuluja dinene. Ncya bushuwa, mwaneetu, ne mêmè ndi nsambila bwa Yèyè kukupeeshaku ditabuluja dinene ne misuuka yàbûngì menemene mu cimenga emu.

⁴ Ne ndi ne disanka mu dinda emu dya kumona bààbûngì bàà ku bambi naanyi. Mwaneetu Outlaw wawa, ndi mfuma ku dimumona anu pângàajuukù kuulu apa, mufumine ku Phoenix. Nenku ndi ne disanka dyamba kuyiila ne panshi pa kukumona kaaba aka, Mwaneetu—Mwaneetu Outlaw, nwènu bàna beetu bàà ku Yelèkò bàdi balwa muneemu mu Yelusalema, bwa kutwendela bwenyi. Tutu misangu yônso anu ne disanka dya kwikalaku naabo. Ncya bushuwa's, Tony.

⁵ Ne pa nanku—ne pa nanku, abidi àdi panshi aa, mvwa mucyâmbile Mwaneetu Williams, ku Phoenix kwaka. “Nudi bamanye's,” mûngààkambà, “Tucson, ndi musòmbèle muneemu mpindyewu, nudi bamanye's. Pa nanku bikengela nshaaleku mutwe kaaba aka nyama ku mikolo mu mushindu kampana, nudi numona's, kuulu kwa mukuna eku, ne mwikàle ntangila panshi ku Yelèkò ne mmona bàna beetu. Mona's, tutu misangu yônso...”

⁶ Nenku Mwaneetu Carl ùvwa wamba mùdi bààbûngì biikàle bafumina ku ntanta wa kilomeeta lukama ne makumi asambombo, bùumukila mu Phoenix emu. Mbanganyi mwab'ewu bàdi bafumine ku Jeffersonville, mu Indiana? Juukilaayibi kuulu. Nseke yônso, mwab'ewu. Awu nntanta

wa wipacila ku kilomeeta binunu bisatu ne nkama yisatu ne makumi asambombo. Kaa, Carl wa yààyà!

⁷ Ne disanka be bwa kwikala kaaba aka ne kusankilaku nsèsà milenga ya dikema ya munda ya Mwânà eyi. Nwamonu's, tutu twamba mùdi eci cimenga ciikàle cya dîbà. Aci's ndwà pambelu. Kadi, kaa, ewu Mwânà wa munda, ekelekele, s'ki cîndi mèmè nsankila.

⁸ Ndi musànkile mabenesha aa lumingu elu, ne mubwele mu ditabuluja dya Mwaneetu Bethany kaaba aka, lwà ku Premières Assemblées de Dieu eku. Kadi ncyà bushuwa ne ndi ngaanyisha disalaayi dya bukutu dya nkuluse edi, wendè nyiishilu mulenga wa dikema awu. Bivwa bimpicile bikole, lumingu elu. Mèmè kwamba ne: "Mwaneetu Bethany ne mèmè tudi ne bintu bya mwomumwe byàbûngì, nangananga mushindu wutùdi tupandulula nsuki yetu, Mwaneetu Bethany." Dîbà adi, bìdi mu mushindu wa ne, tudi misangu yònsò mwa kwikala tujingulangana, kwònsò kutùdi mwa kusanganyiibwa aku.

⁹ Pa nanku tudi ne kusakidila bwa mpùngà ewu wa kwikala kaaba aka ne Mwaneetu Tony. Ncyênà mwa kwamba dîná adi to, ne pa nanku ndi mmubiikila anu ne "Mwaneetu Tony." Nwamfwilaayiku luse. Bàvwa babiikila Peetelo ne, "Peetelo," ne Pòlò ne, "Pòlò," ne pa nanku ewu ewu's n'Tony. Ntu mèmè anu ngambila bantu misangu yònsò ne: "Ikàlà numbiikilaayi anu ne: 'Mwaneetu Bill.'" Aci ki cîndi. . . Byòbì biine, ntu mèmè munange dîná adi dya ne: "Mwaneetu Bill," anyi "Mwaneetu," bwa kwikalaku muswikakane neenu—neenu, bwa kwikala mwaneenu.

¹⁰ Didya dya dinda adi divwa dinsankishe eyo! Cintu cimwepele ncyà ne, kakùvwa musabusabu wa nsukaadi bûngì bukumbane to. Mèmè—mèmè—mèmè kufiitula wònsò. Ki mèmè kwangata wà kùdì mwanaanyi wa balume, kadi kumushiya pende byanza bitupu, kadi kwangata wà kùdì mwanaabo wa balume. Yêyè ùvwa ne dilonga dikwabo dya nsàkìdìlù, kadi ncìvwa anu ne musabusabu wa nsukaadi bûngì bukumbane to. Nudi bamanye, mèmè's ndi Baptiste. Ncìtu mèmè ngiitabuujà dimyamina to. Ntu mèmè munange kubibatiza anu menemene. Ntu munange musabusabu wa nsukaadi wà wàbûngì, wàbûngì awu. Mèmè kwangata cibàkudì cya nsukaadi, kadi kàvwa mushaalemu wa mupitepite bûngì to. Bivwa bikengela bwa mèmè kubyelaku ndambu wa nsukaadi, nudi bamanye's.

¹¹ Ndi mvuluka mu sud mwamwa, mwamwa, ngeela meeji ne mùvwa mmu Alabama, mùmvwà ne ba—ba—Baptistes Missionnaires. Mvwa nsanganyiibwamu, ngenza ditabuluja. Nenku mvwa nsanganyiibwa mu kaambalanda kakese, kàà kale kajìka ne kasengulu, lwà pambelu apu. Nenku kùvwa mwaneetu wa bakaji kampanda mukulumpe wa bafiike kuntwaku. Kwambaye. . . Nudi bamanye's, mvwa muyiishe bikole diloolo

adi, nenku ncìvwakù nansha ne mushindu wa kubiika dinda dya paakacyabu to. Ki kumbiikilaye, ne ndi mvuluka ne ngâkashààla mutabale ntanta mule bwa kumuteeleja wàmba ne: “È, mpaasata.” Yèyè ne: “Munanga wanyi, lwâku kunù. Nkaadi mukulàmbile crêpes misangu yinaayi, kacya kwônsò aku, mu dinda emu.” Mulàmbe crêpes misangu yinaayi ayi’s we! Mêmè ntu—ntu muyinange be. Anu kaabwalu kakese cyanààna kàà dilondelangana, kândi mumanye. Tudi anu kaaba aka mu bwobumwe, nudi bamanye’s.

¹² Mwaneetu mukulumpe Bosworth, mbanganyi bàvwaku bamanye Dr. Bosworth? Yèyè ùvwa mulunda wanyi wa kale wa katapula-kateeka. Kungambilaye, musangu kampanda, yèyè ne: “Mwaneetu Branham, utu mumanye cìdi bwobumwe anyi?”

Ki mêmè ne: “Ngeela—ngeela meeji nanku’s, ngangabuka.”

¹³ Kwambaye ne: “Mbanyààna babidi mu bwatu bumwepele.” Nudi bamanye’s, aci cìdi anu apa, pàdìbo. . . Ne pa nanku ki mushindu wùdìbi ngwòwò awu. Aci’s mbwobumwe bwetu bwa sheemàsheemà ebu; bwa sheemàsheemà, kabuyi bwa bakangilangane biibi to; bwobumwe bwa sheemàsheemà bwa muntu ne mukwende.

¹⁴ Ndi mvuluka, dîngà dituku, ngeelangana meeji pa flapjacks ayi. Tutu tuyibiikila ne “flapjacks,” mu Sud mwamwa’s, Mwaneetu Bethany. Pa nanku tutu. . . Mvwa mu kaalwendu kakese kàà diloba, lwà mu nord mwa New Hampshire mwamwa. Ki cisòmbedi cya bikelè ne mishipa ya màbundu ya bipepa bya matumba ayi. Nenku mvwa ne kantenta kakese kambula paanyima. Mvwa mwambule paanyima apu, bu dituku dijima ne citupa nanku awu dya lwendu, mwaba wùvwà bakwetu bônso bàà makàsà mateketangane aba kabàyikù mwa kufika to. Pa nanku mêmè mvwa kuntwaku nkwatangana ne mishipa ya màbundu’s. Kaa, cikondo kaayipu cîmvwà mpicisha’s we! Ne kantenta kakese kàà muntu umwe anyi babidi. Kadi dituku dishaale, kampoko kakese kàà mâyi, kaa, mùvwa anu mishipa minene ya màbundu milenga ya dikema yisanganyibwamu, nenku mvwa anu nyikwata ne lukasa lwônso. Kadi mvwa mwa kukwata anu wùmwe. . . Mêmè muwushipe, dîbà adi mvwa—mvwa ngwangata ngudya. Kadi, pa ciibidilu, mvwa ngulekelela wùya, byôbì kabiya biwutape bikole to.

¹⁵ Nenku mvwa misangu yônso anu nkwata bìshì byanyi bya diloba naabi pa cikùtùkùtù cikese cya mici ya saules ya cifukilu paanyima paanyi apu. Ki mêmè kudyambidila mundamunda ne: “Dinda dyàlondà, pàcyacyà, nêngiikalè mwa kwangata cisuuyi cyanyi ne nêmpwekè kuntu kwaka bwa kuupula mucu wa saule wa cifukilu wawa,” bwalu ndi mufwanyine kukwataku Cìshì cyanyi cikese cya diloba naaci mu—mu mucu wa saule wa cifukilu wawa. Pa nanku mêmè kubiika pàcyacyà, kudyambidila ne: “Ee, s’ndiku mufwanyine kukwata mushipa wa dibundu

wùmwè anyi yibidi bwa didya dya mu dinda.” Piine apu mwwa nkaayanyi. Ki mêmè kwangata kasuuyi kaanyi kakese kàà kale aku e kupweka ne kuupula mucu mukese wa saule wa cifukilu awu ne kukwataku ndambu wa mishipa, nkaavwa mu njila wa dyalukila.

¹⁶ Ki mêmè kuumvwa mutooyi kampanda. Ùvwa ng’ours mukaji. Kuntwaku kùvwa kùle tente ne yôyi ayi. Ùvwa ng’ours mufiike. Ùvwa ne twânà tubidi. Ne ùvwa mubwele mu ntenta wanyi. Yikaavwa mimuupule. Kakùvwa kushaale kantu nansha kamwe to. Civwa anu . . . Kî ncidìyi yìdya cìdi ne bwalu to; kadi ncidìyi yinyangakaja. Yôyi myumvwa anu cintu kampanda cisalakana, yìdi—yìdi yìdyelapu, nudi bamanye’s. Nenku lubungu lwa dicyuwa dyanyi dya diipikila lukaavwa lutuutakaja, ne, ee, ncìvwa ne cya dyenza nansha cimwe to anu kwalukila cyanyima.

¹⁷ Kadi ours mukaji wa cikunda awu mmwenze anu ummona nseemena, kudyalaye lubilu ne kukungulaye ubiikila twânà twende atu, ki kamwe kàà ku twôtò kulwaku. Kakwabo kakaakalwa to. Ee, mêmè kudikonka bwa cinyi kakàvwa kaye. Ee, mwva—mwva ne kaacingoma kaanyi kàà kale kàà ku mikaba kakwàte dimòmà kashààle mu ntenta amu, kadi ours awu ùvwa musòmbèle pa kaacingoma aku. Pa nanku ncìvwa muswe mene kwasa ours mukole awu to, mêmè mwine, bwa kushiya twânà twa nshiya tubidi mwítu amu. Pa nanku mêmè . . . Nenku ncyà bushuwa ne mêmè . . . Wèwè mukwate ours maamù mukole mwikàle ne twânà, yèyè’s ùdi ukwela nzadi yetu ya cya bushuwa eyi, nudi bamanye’s. Yèyè—yèyè ùdi ubinduluka ndambu mu mushindu kampanda paùdi ukeba bwa kutacisha twânà atu apu.

¹⁸ Pa nanku kakwacikwetu aku kàvwa kasòmbe, kàà bwalu kàvwa anu kânà kàà ours keetu kàà menemene aka. Kamweka kafwanyine kwikala ne bujitu bwa kílò citeema; kílò mwandamutekete anyi citeema. Pàvwa mpa dindadinda, twôtù atu tùcìvwa tupatukilaku mu kulaala kwa mu muvù wa mashika mu katanci kakese amu. Nenku kalumyana aku kàvwa keele nyima kùmvwà aku, katuntamanangane anu kònsò, mushindu ewu. “Ee,” mungààkadyàmbidilà, “cìdi citambe kukoka ntema ya kakwacikwetu kaka ncinyi’s?” Kadi maamù ours mukole awu ne kakwabu kânà kakese aku bàvwa pambelu apu, ne mutungunuke anu ne kukungula ùkàbiikila, kadi kakàyikù mwa kutuma ntema nansha mikese kùdiye to.

¹⁹ Mêmè kudyambidila mundamunda ne: “Kadi mbwalu kaayi ne kakwacikwetu kàka’s?” Mêmè kupeta mucu mu njila amu, kùmvwà mwa kubànda bu yèyè mwa kulumbatangana naanyi. Pa nanku mêmè kudyambidila ne: “Bikengela ngǎnjibi kumona ne ncinyi cìdi cikoke ntema ya kakwacikwetu kàka.” Pa ciibidilu twôtò atu tùtu tùnyeema. Pa nanku mêmè kutungunuka ne kuseemena pabwipi apu, mwikàle mutabaleele mamwàkù awu,

too ne mungààlu kufika pabwîpî mwikàle mupengame ndambu. Kadi's nudi bafwanyine kupapuka bwa civwà munkaci mwa kwenzeka.

²⁰ Kalumyana aku kàvwa kapete mbekeci wanyi wa musabusabu wa nsukaadi, ne—ne kambekeci kakese kàà musabusabu wa nsukaadi kàà litres bu yibidi nanku. Nenku kàkaavwa kakàngùle mùfínyikù wa kambekeci aku. Ne yôyì yìtu minange bintu bisheeme's, twamb'eku twamb'eku, nudi bamanye's. Kakàvwa kamanye mwa kuwunwa to. Pa nanku kàvwa anu kàngata kakamà kààkù kakese aku kàkìinyijamù ne kàwùlaka, mushindu *ewu*, nudi bamanye's, pàvwàku kàkàmbulula. Nenku kakàvwa—kakàvwa mwa...Mémè kukèèla lubila. Mémè kwamba ne: “Patuka muntwamu.” Ki kukùdimukakù. Kakàvwa mwa kukàngula mèsù to, ne musabusabu wa nsukaadi awu mu twísù amu, nudi bamanye's, pàvwàku kàtàngila, nudi bamanye's. Nenku kàkaavwa kalake mu kambekeci amu mushààle mutooke tòò anu bu ne bàvwa bamùsukùle.

²¹ Ki mémè kwimana e kuseka anu cyanàànà. Ne dībà kanà dyònsò, wa bwalu ncìyi ne cyamu cya fòtò to, nudi bamanye's, bwa kukwataku cyòci aci fòtò. Kadi's ki kòkò aku. Ki dībà adi paanyima pa kamane kulaka, nudi bamanye's, mu kambekeci mwònsò amu, bilenga bya kacya, ki kuyaku kùdi maamù mukole awu ne kânà kaabu kakese aku, nenku abu kadi ki kukàlàkabò.

²² Pa nanku—pa nanku mémè kudyambidila ne: “Cyacya's ncyenze anu bu disangisha dya mpenta dilenga dya cyena kale's, patùdì twela byanza byetu mu ciimulangi cya bwìcì, biinyije too ne mu nkèngìbwà. Ne pashiishe tupatuka, tukambila muntu mukwabo, twanji tumulekela utulakaku pambidi ndambu, nudi bamanye's. Anu disangisha dîmpè dya dilàka adi, nudi bamanye's. Ki cîngààkadyàmbidilà ne ki civwà ka-ours kakese aku munkaci mwa kwenza's.

²³ Mpindyewu, kakùvwa dipiishiibwa kùdiku to, pàvwàku anu kalakangana ne musabusabu wa nsukaadi awu apu, nudi bamanye's. Pa nanku mushindu awu ki wutùdì tudyumvwa mu disangisha dîmpè dya mushindu wa cyena kale. Kamwenaku dyumakana to. Kamwena kantu nansha kamwe to, kadi nudi nusòmba anu cyanàànà nulaka. Kwajiki.

²⁴ Mu Bible, nudi bamanye's, mulami wa mikooko ùvwa wènda mwambule nsapu wa ku luseke mulembeleja ku dyāpà. Nenku misangu yàbûngì, mwômò amu, ùvwa mwa kwambwilamu ndambu wa bwìcì. Nenku pàvwàye upeta mukooko mwikàle wùsaama, mulami wa mikooko awu, ùvwa mwa kuya, kukaminaku ndambu wa bwìcì abu, pa lubwebwe lutooke lwa kàlisumù. Ne mikooko pààyi, yìtu kabidi minange cintu cya cisheeme, nudi bamanye's. Pa nanku ùvwa ùya, mukooko awu wùvwa wùya, ne wùbanga kulàka pa lubwebwe

alu. Wùvwa wùlaka bwìcì, kadi pàvwàwu wùlaka bwìcì apu wùvwa wùbàkwilakù ne ndambu wa kàlisumù aku, ne kàlisumù aku kàvwa kambulwisha ku diwondopa.

²⁵ Mémè ndi ne nsapu mujima wa ku luseke mùle tente ne bwìcì kaaba aka, ne nèngiikalè mwa kubwèla pa Lubwebwe alu, Kilisto Yesu, ne nwènù mikooko nubangaayaaku kulaka mpindyewu. Ndi mutwishiiibwe ne nebu—nebwondope matakanyika etu ònsò nkòòng bu twètù anu mwa kulaka pa Lubwebwe lwa bikondo alu, nenku ncyà bushuwa ne Yèyè neatangile bikwabo byònsò bìdì bishààla abi. Yèyè ki Mwondopi wetu wa ntatu ya mubidi ne ya nyuma. Yèyè ki Mbata wa mu cibanda. Ne mu mbata tudi tusanganamu opyùmù, ne opyùmù ewu ùtu wàkaja maalu ònsò. Ùdi anu ùkushiya mu ngiikadilu wa lungenyi lùkujìmina, ne mushindu awu ngùtù Nyuma Mwîmpè ulwa. Ùdi ukuteeka mu ngiikadilu wa kuyi ulubakana mùdì kuyi ucyuka ne nganyi udi musòmbè ku luseke lwebe anyi cintu nansha cimwe to. Udi mwenzejiibwe bwa kukosaku kajilu dîbà adi. Ki mùdibi.

²⁶ Ndi mvuluka nsongaakaji kampanda wa citende mûngà musangu wàkuujiibwa tente ne Nyuma Mwîmpè. Ùvwa pende Méthodiste mutekete. Nenku ùvwa munkaci mwa kufila bujaadiki kampanda. Kadi ncyadyakupwaku mwoyi cyakwidi cikayabale aci to, kaciyi citambe cindì mémè ngamba eci ku bubi to. Nenku kwambaye ne: “Ee, ndi njinga kutumbishaku Mukalenge bwa Nyuma Mwîmpè ewu.” Kwambaye ne: “Bu byòbi bîmpè kupita apa, mémè’s mvwa mwa kutaayika.”

²⁷ Ntu munange mpungilu ewu ne masangisha a Beena Kantu-ku-Byanza bàà Evanjeeliyo mu Kaabujima aa. Kadi nudi bamanye’s, mbanjidile mu mudimu kukaadi ndambu wa bidimu, kukaadi bidimu bitwe ku makumi asatu ne bitaanu, mu église Baptiste Missionnaire. Ne mwômò amu ngàkateeta bwa kwikala mwambi wa lulamatu ku Evanjeeliyo, ne ku cyònsò cîmvwà mumanye ne ncilelela, munda mwa bidimu. Kadi pashiishe paanyima pàà cikeena-kumona cinene aci cilwe. . .

²⁸ Bya bwalu mémè kacya ncìvwakù mwanji kuumvwa baakula bwa cintu pààcì ne m’Mpenta to. Mvwa ngumvwa bamba ne kùvwa musùmbà wa bansantu babunguluki bàà mu malaba mu ville, bamacisha nta panshi, ne bikwabo byònsò. Ee, kacya ncìvwakù nansha mutabaleele ciine aci to. Kadi pàakambiikilà Nzambi, ngàkalwa munkaci mwabo, ne ndi anu ne. . . Byakamweka anu bu ne cyòcì aci ncìvwà mu wànyì mwoyi, mwikàle njinga cintu kampanda ngamba kufwa, ncyenze anu bu kuvwala kwa gant ku cianza cidì ne mashika’s. Cidì anu cintu cyetu cya cijaalame eci, ne bulelela cyòcì ncinsankishe bikole.

²⁹ Pàngààkalwà munkaci mwa bânà beetu abu, ngàkasangana ne munkaci mwabo bivwa anu bu mutùdi twètù ba-Baptistes.

Bàvwa bakosolokangane mu malongolodi mashiileshiilangane búngì cyanààná! Ekelekele, bàvwa mishindu ntùnda ne ngenene. Ne bamwe bàà kùdìbo bàvwa benda babànde pa kameelu kàà dikokò dimwe, ne bakwabo kàà makokò abidì, ne bānga kàà makokò asatu, ne bakwabo kàà kakàyi nansha dikokò diine to. Kadi, nudi bamanye's, mēmē kudyambidila mundamunda ne: “Ncyakushaalaku wa mu cisumbu kampanda nansha cimwe to, bwalu ndi mufwanyine kufwanyikijiibwa anu ne cyôci cisumbu aci. Pa nanku nēngiimanē mēmē anu pankaci paabo ngamba ne: “Tudi bānà bàà muntu.”

³⁰ Ngeela meeji ne ùvwa n'Yakobo wakumbula ciinà cya mǎyì, kadi beena Peleshete kumwipataku. Mēmē muvuluke bǐmpè menemene, yēyè wàkacìnyika dīnà ne “Budimu,” anyi cintu kampanda. Pashiishe kuumbulaye cikwabo, e kwambaye ne beena Peleshete baakamwipataku, pa nanku kuciinyikaye dīnà ne “Dikokangana.” Kuumbulaye cikwabo. Kwambaye ne: “Kùdi mwaba bwetu bōnsò.” Nenku ki cīndì mēmē ngiitabuuja ncyôci aci. Kùdi mwaba bwetu bōnsò.

³¹ Nenku mpindyewu mēmē, cintu cimwepele cīndiku mushaale wa ku cyôci kacya ngâbwela mu nkwaka wa Evanjeeliyo mu kaabujima, ndi umwe wenu nwēnù. Ne ndi ngeela meeji ne ki cintu cya citambe kwikala pabwǐpì ne Dyulu cìdiku. Kwôkò cintu kampanda cya citambe kwikala pabwǐpì, nēnteetè bwa kucipeta. Kadi *Eci* ki cīndì mupete, ne ndi munange *Eci*. Nēnshaalè ne *Eci* too ne pààlwà cintu kampanda cya citambe bwǐmpè. Nenku ndi mwindile bwa cintu kampanda cya citambe bwǐmpè cilwe. Bu mwākambà Peetelo, mu Dituku dya Mpenta, wākamba ne: “*Eci* n'Cyôci aci.” Kadi pīikalà *eci* kaciyi *Cyôci aci* to, dībà adi nēndamè *eci* too ne pààlwà *Cyôci aci* apu. Pa nanku, dībà adi nēnshaalè kacya anu ngaakwata ku cyôci *eci*, bwalu cyôci *eci* ncǐmpè citàmbe.

³² Nenku pashiishe mēmē kusangana ne Beena Kilisto bàà Kantu-ku-Byanza aba, Beena Kantu-ku-Byanza bàà Evanjeeliyo mu Kaabujima aba, bàvwa anu kacya baashaala mu mushindu kampanda mu ngiimanyinu umwèumwè awu, pankaci, pankaci pàà malongolodi manene, malenga a maakeleeziya, bateeta bwa—bwa kwela cilamba pa cintu kampanda, cìvwà ne, kwenza bwobumwe, balwangana ne mwabo mwōnsò, kabàyi bateeta kutangalaja nansha bumwe bwa ku malongolodi abo awu to, anyi kwenza bwa ònsò kubwelawu mu dimwepele to, kadi anu bwa kutwalaku bwobumwe kampanda. Nenku ki bwa cinyi mēmē ndi mushaale wa ku bōbò. Nenku ki bulongolodi bumwepele bündi wa mwömò ng'ebu ebu, Beena Kantu-ku-Byanza bàà Evanjeeliyo mu Kaabujima aba, bwalu bündi—bündi buteetaku kwenza cīndì mēmē ngeela meeji ne ki. . . cìdì cifwanyine kwikala mudimu munene bwa Nzambi ne Ekeleeziya Wende, bwa kutwala njiyà kampanda munkaci mwetu, ya ne katwena bapanduluke to. Tudi bānà bàà

muntu, ne tudi bônso bapete Nyuma Mwîmpè umwèumwè awu. Mpindyewu, Nzambi mmukupeeshe wèwè Nyuma Mwîmpè; Yèyè kupeesha muntu udi ulonda awu Nyuma Mwîmpè.

³³ Byenze anu mùdi musùmbà wa ba-Branhams, ndi ne bânà beetu bàà balume citeema, ne kùdi bamwe banene bàà bitupa, baleepa bàà tunyìitunyi, ne mèmè ndi Mukalenge-Nkacinkaci. Pa nanku bôbò—bôbò mbashiilangane, bamwe bàdi ne nsuki mitookoloke, ne bakwabo ne nsuki mifiike, ne bakwabo kabàyi naayi nansha mikese to. Ne pa nanku mèmè ndi anu Mukalenge-Nkacinkaci. Pa nanku, kadi, mwômò amu, tudi—tudi bânà bàà muntu. Tuvwa ne ciibidilu cya kupatuka kuya mu—mu bulà bwa kumfundu kwa nzubu ne kalwishangeenaku mvita muntu ne mukwende. Kadi patùvwà tukafika mu bulà bwa kumpala kwa nzubu ne muntu kampanda ubunda umwe wa ku ba-Branhams, uh-kaa, apu maalu's àvwa ànyanguka.

³⁴ Nenku mushindu awu ngùndi mèmè ngeela meeji ne bìvwa bikengela bwa twètù kwikalaku tudyumvwa, nudi numona's. Misangu mikwabo Nzambi ùtu wenza bintu bitùdi twètù aba. . . kabiyi bifwanyine anu kumweka bijaalame ku mèsù kwetu to. Kadi, nansha nanku, piikalàbi ne Nzambi ngudi ucyenza, twàmbààyi twètù anu “amen” ku cyôci aci. Nzambi ngudi ucyenza, nansha bya munyi, nwamonu's. Nenku twètù tudi—tudi bindile cikondo kampanda ciikalà. . .

³⁵ Mvwa musòmbe mu disangisha dya Mwaneetu Bethany diloolo dya dyalumingu dishaale, yèyè munkaci mwa kuyiisha pa cimanyinu cya nyama wa lwonji, kadi mukwetu awu kulengaye bwalu bunene kampanda bwàkashiyà musuuka wanyi wùtùpika ne disanka. Úvwa mwambe ne anu mu njila mutùyaayà emu mùdi cintu kampanda citambe bunene cindile, cintu kampanda cya mushindu awu kuntwaku, cintu kampanda cìdi Nzambi ùdilongolola bwa kwenza. Ndi nciitabuuja, mèmè paanyi, bwa kutwa cishindaayi ku cintu eci ne kutuma Ekeleeziya mu Butumbi. Mushindu mwine wùdibi bilenga bilaya's we! Mpindyewu katushaadi anu batambe kwikala beena lulèngù mpindyewu to, bwa twikalè. . .

³⁶ Vulukaayi ne, kacya Nzambi kàtukù ushintulula mishindu Yende ya dyenza maalu to. Yèyè ùdi. . . ushaala anu mwende ne kale, bwalu Dìyi Dyende. . . Yèyè ùdi Dìyi, ne Dìyi Dyende kaditukù mwa kupangila to. Yèyè kèna ne mikàlù to. Ki bwa cinyi Nzambi Yèyè mwangate dipangadika pa cintu kampanda, didi ne cya kushaala anu mushindu awu kashidi. Kèna mwa kwalukila cyanyima kwamba ne: “Mvwa mutupakane” to. Nwamonu anyi? Mèmè ndi mwa kwenza nanku; wèwè udi mwa kwenza nanku. Kadi, Nzambi kèna mwa kucyenza to, bwalu Yèyè kèna ne mikàlù to. Nwamonu anyi? Dyende dipangadika dya ntwadijilu ndya Cyendeleele.

37 Pààkapèèshà Nzambi muntu dyediibwa ditambe bwimpè dya mu bimanu divwàYe mwa kwikala mupeeshe Bende Yèyè. . . bwa kumuswikilamu, bwa kumukangilamu, Nzambi wakapa muntu Dîyî Dyende mu budimi bwa Edena, Dîyî Dyende. Kadi Eva kwenzaye cintu cya macimbu, cya ndekeelu, cinene aci. . . cimwe cya ku bintu bya bitambe kwikala bya macimbu byakenzaye kacya, anyi cìvwàye mwa kwikala mwenze, cìvwa nkulukakaja kwa lungenyi ne Dîyî dya Nzambi. Katwena tulukakaja lungenyi to; tudi tuDiitabuujà anu cyaànà. Mpindyewu, kacya Nzambi kàtukù mwanji kukwata mudimu ne cintu kampanda cikwabo pa kuumusha kwitabuujà kwa Dîyî Dyende to. Ncya bushuwa. Dîyî Dyende, tudi ne cya kushaala paanyima pààDi.

38 Mpindyewu twǎnjì kwimanaayiku kakese mwab'ewu. S'nudi bamanye ne dituku dikwabo Bible ukaavwa mudyanjile kwamba bwa muprofeza munene uvwa ne cya kulwa uvwa ne cya kusangisha Izaleela awu. Kadi paakalwaYe, nudi bamanye ne Yèyè wakapicila anu munkaci mwa bantu mene amu kadi bôbô kabàyi bamanye anyi? Ne pashiishe dîngà dituku Yesu ùvwa munkaci mwa kuyiikila ne bayiidi Bende, wamba ne: "Mwànà wa muntu neabande ku Yelusalema," ne bikwabo.

39 Kwambabo ne: "Bwa cinyi bafundi. . ." Mu ngaakwilu mukwabo ne, bafundi bàà Mifundu. "Bwa cinyi bafundi mbambe ne Eliya ùdi ne cya kwanji kulwa ne kwakajulula maalu ônsò?"

40 KwambaYe ne: "Ndi nzwambila ne, mu bulelela Eliya neǎnjì kulwa. Kadi Ndi ngamba ne Eliya ukaadi mumane kulwa kadi nwênù kanuyi bamanye to. Nwamonu's, mmupicilemu buludi; kabaakacimanya to. Bya mwomumwe ne Mwànà wa muntu." Baakuumvwa ne uvwaYe wamba awu ùvwa n'Yone Mubatiiji. Mpindyewu, nwamonu's, yèyè ùvwa anu muntu wa cimfiikààmùndà lwà ku musulu aku mwaba kampanda, muntu wa mu cisuku, ùteeta bwa kunwisha bantu tubalu mu mâyi, ne bikwabo, mukenji wa pabwawu menemene. Kadi awu's ki uvwa mudyanjididi wa Nzambi. "Kadi cyakapita, ne kabaakamanya nanshà to." Yesu wakalwa. . . Ngeela meeji ne cya bisatu cimwe cya beena Yuda kabaakumvwaku bwa bwalu bwa Yone to.

41 Ndi ngeela meeji ne, pààkalwà Yesu pa buloba, beena Yuda bapitepite bûngì, ne cya lukama cimwe cya bantu bàà pa buloba, kabaakamanyaku nanshà ne Yèyè ùvwapu to. Yèyè wakalwa ne wakaya.

42 Ekeleeziya, nwênù beena Katolike, nansha mwônso munùdi nuteeta kulaka mukana nwamba ne Patrick Munsantu ngwenu amu. Muntu yônso ukaadiku mumanye Patrick Munsantu awu, yèyè's ùvwa mwambe kwikala mwena Katolike, Katolike kàà cyena Loomo, anu bu mêmè kunu. Pa nanku, kadi tangilaayi, tangilaayi Jeanne d'Arc, mushikankunde mutekete wa cijila uvwa umona bikeena-kumona ne bikwabo awu. Nwàkenza

cinyi? S'nwakamwoshila ku dikunji dya dyoshelangana, nwamba ne mmuloji. Yèyè's wàkaya kumpala kwa nwènù kumanya ne ùvwa munsantu. Nwamonu anyi? Nudi bamanye mùdì bwalu, aci kacivwakù cifwanyine kwikala cya cyènza bwôwà anyi?

⁴³ Kadi Yesu wakamba ne: “Anu mwakadibi mu matuku a Noa, ki mwikalabi kabidi ku dilwa dya Mwânà wa muntu, mwàkasùngidiibwà misuuka mwandamukulu ku màyi amu.”

⁴⁴ Ambaayaaku tũng bu Dyambwibwa dilwe leelu ewu? Ne Yèyè mwangate babidi mu Tucson, ne umwe mu Phoenix, ne pa buloba bujima, bu mùdibi ne Dyambwibwa nedyenzeke buloba bujima. Ne aba bààbìika ku bafwe nebaye katuutakeena Nende mu mpeepele, ne badifinda, cintu cya kacyi cyumvwikaku to. Ne pashiishe dimwe dya ku matuku adi panshi aa manyooka neadikume pa buloba. Wèwè udi wamba ne: “Ee, Dyambwibwa kadivwa ne cya kwanji kwenzeka anyi?”

“S'dikaadi dimane kulwa, kadi kanuyi bacimanye to.”

⁴⁵ Elaayibi meeji ne mbantu bùngì kaayi bààjìminà pa buloba leelu ewu, kadi kakwakwikalakù nansha dýì dimwe dya bàbùtèèja. Kanwakumanyaku kantu nansha kamwe pa bwalu abu to. Nekwikalè bantu nkama yitaanu pa buloba leelu ewu bìikalà mwa kupangika, kadi kanwakumanyaku kantu nansha kamwe pa bwalu abu to.

⁴⁶ Tudi ne mwoyi mu cikondo cya cikwacisha bwôwà cya kacya. Twikalaayi ne myèndù yetu milongolola kayìyi dikalà. Ncyènà ngamba ne nebìikalè mushindu awu to. Ndi ngamba ne, kadi bu byôbì mwa kwikala nanku? Dìbà adi's cilumbulwidi cìdi cidikuma ne Dyambwibwa dimane kwenzeka. Nwamonu anyi?

“Yèyè ukaadi mumane kulwa, kadi kanuyi bacimanye to.”

⁴⁷ Pa nanku patùdi tudisangisha mu masangisha aa nunku, tudisangishaayi, twètù, mu kiipacila kamwepele, kàà kukwacila Nzambi mudimu. Tuteekaayi nsòmbèlu yetu ku mudimu. Bidi ne dikwacisha kaayi kutùdi bwa kutentula cintu kampanda? Bwa cinyi butwitabilà mupinganyi pàdi maulu ònsò nkòong mûle tente ne bukole ne mabenesh, bishuwashuwale bya mpenta? Bwa cinyi bùdìbi mwa kukengela bwa twètù kwitaba mupinganyi's? Kanwakusunaku e kumana mabenesh a Nzambi to. Lombaayi tente mu nzubu tente pambelu.

⁴⁸ Nudiku mwa kudifwanyikijila kanselenge, bule bwa centimètre umwe ne katupa, munkaci mwa mbù mwamwa, kamba ne: “Bivwa bimpè bwa mèmè kwikala nnwa màyi aa ndobelelaku. Ndi mufwanyine kuàmana ònsò” anyi? Mpindyewu, aci's cìdi cyumvwika cya bucimbè's. Ee, s'mbya bucimbè bupite ne apu, paùdì wela meeji ne udi mufwanyine kusuna kumana bwimpè bwa Nzambi.

⁴⁹ Mèmè, munkaci mwa kutangila kukaadi katanci kampanda, kabidi nduumu bwa kumona muntu mukulumpe awu, tatwèndè

wa Carl Williams ne mamwëndè; musangu wanyi paanyi wa madyatambalà wa kupetaku dyèsè dya kubamona, bwa ku dyanyi paanyi dimanya, biimane kuulu. Ne ndi ngeela meeji ne, bidimu biipacila ku makumi mwandamukulu, cintu bu nanku awu, ne mushindu mwine wùdi Nzambi mulame babaka banunu bàba's. Yêyè's mmufwanyine kumweka anu bu ne ntùùtwëndè wa Carl, kàyi bu tatwëndè to. Ne Tony ùvwa wàmba ne mamwëndè ùvwa mupatuke mu kashinyi amu, ne mutuute ciibi bikole, ne mutwe ngendu bu mùsòmbèèlè musalaayi mutekete amu. Ekelekele, ekelekele! Nwamonu anyi? Mushindu mwine wùdi Nzambi mudileeje mwimpè kutùdi's we!

⁵⁰ Mpindyewu, wêwè kuyi—wêwè kuyi cidimba cya Beena Kantu-ku-Byanza bàà Evanjeeliyo mu Kaabujima aba to, nwênù balumyana. . . Mémè bu Baptiste, ndi ngaakula neenu nwênù ba-Baptistes. Bu Méthodiste, ndi Méthodiste.

⁵¹ Nenku musangu kampana mvwa nyiisha mu Arkansas ne mvwa mwa. . . Kùvwa muntu mukulakaji wëndela ku mabaya a balema, ne ùvwa mwondopiibwe. Ùvwa upaanyisha ma-crayons mu njila. Nenku ùvwa mwimane kuulu diloolo adi, ne disangisha dijima dívwa dikwàcila ku byanza kùdiye. Kùvwa bu, kaa, ngeela meeji bantu binunu bitaanu anyi bisambombo badisangishe muntwamu ku Robinson Memorial Auditorium, ne yêyè. . . ku Little Rock. Nenku ùvwa anu wenza kwamba ne: “Nzambi atumbe bwa dingondopa.” Kuyiku nansha mwa kuyiisha to. Ki dyakamwe kujuukaye kuulu. Kwambaye ne: “È, Mwaneetu Branham, ndi njinga kukwambilaku cintu kampana.”

⁵² Mpindyewu, yêyè ùvwa mu dicyonkomoka dya budì ne bunù dyende yêyè sungasunga. Pa nanku yêyè—yêyè ùvwa anu mu cikondo cya dicyonkomoka. Ùvwa mwondopiibwe ne aci ncivwà ne musinga wàbùngì bwende yêyè. Pa nanku kwambaye ne: “Udi mumanye's. . .” Kwenzekabi ne, yêyè ùvwa Nazaréen. Ki yêyè ne: “Udi mumanye's, pâmvwà mukumvwe wakula, mvwa mutwishibwe anu ne wêwè utu Nazaréen.” Kwambaye, pashiishe kwambaye ne: “Ne mémè paanyi. . .” Yêyè ne: “Pashiishe mémè kuumvwa muntu kampana wàmba ne wêwè udi Baptiste.” Yêyè ne: “Kadi bantu bààbùngì bàà ku baùdi naabo kaaba aka's mbeena Mpenta. Aci ncyènà ncyumvwaku to.”

⁵³ Mémè kwamba ne: “Kaa, aci's cipeepele cya dikema.” Mémè ne: “Mémè ndi mwena Mpenta Nazaréen Baptiste.” Ki bwalu mbwòbù abu's. Ncyà bushuwa.

⁵⁴ Twètù tudi beena Kilisto, balediibwe ku Nyuma Wende, basukula mu Mashi Ende, bindile Dilwa dya Mukalenge wetu. Mukalenge anubeneshe.

⁵⁵ Pawikalà mwena kantu-ku-byanza anyi nî ncinyi cikwabo, lekela nkwambileku bwalu. Bwela. Lwàku, bwela mu

bwobumwe. Kwikadi ubwela mu bwobumwe anu ne musùmbà wa bantu baùdi mwa kulabulangana naabo ku cyanza cyanààna to, kadi peta cidìbo naaci aci, Nyuma Mwîmpè. Aci ncìdi citwala bwobumwe bwa cya bushuwa.

⁵⁶ Udi mumanye's, kwèna mwa kukwatakajaku cintu nansha cimwe to. Kwèna mulombiibwe bwa kukwatakaja cintu kampanda to. Ekeleeziya kî mmulombiibwe bwa kupatula anyi kukwatakaja mamuma to. Wèwè bùdi naabu mbwa kukwama mamuma. Wamonu anyi? Kwèna mwa kwambila—kwambila mukooko ne: “Kwatakaja myòsà” to. Lekela alwe yèyè anu mukooko, nenku neatoloke myòsà. Ki lutatu lùdiku pa bwalu abu ndwòlò alu, tudi twètù tuteeta kukwatakaja cintu kampanda. Kucikwatakajiku to. Ikala wèwè, longolola wèwè anu munda amu cyanààna.

⁵⁷ Nudiku mwa kudifwanyikijila nyuunyi mufiike musòmbè mwaba wawa mwikàle udisomeka masala a nyuunyi wa kayiba mu mapwapwa ende amu, kadi wàmba ne: “Nudi numona mùndi mêmè nyuunyi wa kayiba anyi?” Yèyè's ùdi uteeta kusomeka cintu kampanda citù kacya kaciyikù citolokele munda amu to. Nenku tudi tusangana bya nanku bipitepite búngi munkaci mwa bisumbu byetu bya beena Mpenta. Twikalaayi beena mpenta balelela, bashuwashuwale, balediibwe cyakabidi. Nèngàmbe mpindyewu ne, ki cintu cimwepele cîndiku musangane, luseke lwa dya muneemu lwa Dyulu elu, cidì cimpeeshe ditwishiibwa dya ne mpekaatu yanyi yikaadi miye, ne ndi mulediibwe ku Nyuma wa Nzambi. Dìbà adi udikù ne cintu kampanda, lwôngo munda mwebe amu, lùdi lukwate ndeeng.

⁵⁸ Ee, ncìwva ne kiipacila kàà kwangata dìbà dyenu dyàbúngi mushindu awu to. Ndi mumanye ne bìdi bikengela bwa nwènù kuya. Ne mu mushindu kampanda mêmè ndi bu umwe wa ku balumyana bàà muleebuluku aba. Bidi bingangata mêmè pabwîpi ne dìbà dijima bwa kubanga, ne pashiishe nyiisha mêmè matwe ku abidi, pashiishe bingangata mêmè matwe ku asatu bwa kufika ku diimanyika. Pa nanku ncyà—ncyakwikala muumishi wa maalù wa nanku awu to, mu dinda emu, nansha nanku. Pa nanku tudi twanyisha dilwa dyenu.

⁵⁹ Nenku nkaadi musòmbèle muneemu mu Tucson mpindyewu, mu Yelusalema mulenga wa kale emu. Nenku nêmpwekè musangu umwe anyi yibidi, Mwaneetu Tony, bu Mukalenge mwa kwanyisha, bwa kwambulwishanganaku mu nyungulukilu emu, ne kubwelaku mu ônsò a ku matabuluja enu bônso. Kunùdi nwènù bambi naanyi, ncyênàku mulwe muneemu bwa kwasa ekeleeziya nansha umwe to. Ndi mulwe muneemu mbwa kwambulwisha cikaadibo bamane kwibaka, bwa kwelaku bwanyi bwenzeji ku cyònsò cîndiku paanyi mwa kwenza aci, bwa kunwambulwisha nwènù bàna beetu bwa kupeta misuuka muneemu mu Tucson, kabiyiku bwa kutwadija disangisha mwaba kampanda to, amba anu ciikàle disangisha

dya belangane mu diboko anyi cintu kampanda cya twêtu bafwanyineku kudisanga pamwe. Ncyênàku mulwe bwa kujuula ekeleeziya nansha umwe to. To, mukalenge. Tudi naayi bûngì cyanààna. Citùdì tujinga nkuyipacisha ne beena Kilisto balediibwe cyakabidi. Eyowa's, mukalenge.

⁶⁰ Pa nanku ndi mwab'ewu bwa kutwaku maboko, ne kwambulwisha mu mushindu wònsò wùndiku paanyi mwa kwenza awu, ne mwaba wònsò wùndiku paanyi mwa kwikala awu, ne ku ciibi cyònsò cìdì cyunzulula aci, bwa kufila bujaadiki bwa ngàsà musungidi wa Mukalenge wetu Yesu Kilisto, ne dyújiibwa dya Nyuma Wende utu mundame bidimu byònsò ebi awu. Mpindyewu, misangu yàbûngì. . .

⁶¹ Mwya mumone Tony, kukaadi cikondo kampanda, wàmba ne: "Bikengela ngiikalè mfunda, Mwaneetu Branham, bîmvwà njinga kwamba abi." Nansha mêmè paanyi. Udi mumanye ne paùdì ukulumpa ndambu, kucyena wela kabidi meeji anu menemene múvwà wela pa ciibidilu amu to.

⁶² Muntu kampanda ùvwa wàmba, dîngà dituku, wàmba ne: "Mwaneetu Branham, wêwè ukààdi ne bidimu bîngà?"

"Kaa," mêmè ne, "s'nkaadi mupite pàà makumi abidi ne bitaanu."

"Bîngà?"

Mêmè ne: "Nkaadi mupite abi bwa musangu mwibîdì."

⁶³ Pa nanku, ncìcyènà mwànà mutekete kabidi to. Ki bwa cinyi tutu tupandulula nsuki yetu munkaci's, mwaneetu. Ncya bushuwa. Ncya bushuwa.

⁶⁴ Ee, bantu bònsò mbanange Mukalenge anyi? Kaa, bilenga be! Mpindyewu, tuteekaayaaku mpindyewu kaabujitu kònsò ne kaalutatu kònsò ku luseke.

⁶⁵ Nanku ndi ndikonka ne, byôbì bifwanyineku kwikala kabiyi bitamba kutacisha mpindyewu, bu mùdìbi ne tukaadi basòmbè ntanta mule, ní tudiku mwa kujuukila kuulu bwa katanci kakese cyanààna bwa disambila.

⁶⁶ Nanku mpindyewu panùcìdì biimanyine kuulu apu, nêmbalè nshapita kampanda, anyi mvensa, mu Bible, panùdiku nuteeeleja ne ntema yònsò apu, bu nwènù mwa kuswa. Nêngiikalè mwa kubala mu mukanda wa Bwakabuulwibwa bwa Yesu Kilisto, kubangila ku mvensa wa 14 wa nshapita mwi3.

Ne kùdì mwanjelo wa ekeleeziya wa . . . Laodikiya funda ne: Maalu aa ngàdì Amen wàmba, ntemu wa lulamatu ne mulelela, cibangidilu cya bufuki bwa Nzambi:

Ndi mumanye byenzedi byebe, . . . kwèna nî nne mashika anyi ne luuya to. Mvwa' kuswa bwa wikalè ne mashika anyi ne luuya.

Pa nanku bu mùdì civumvu, . . .kuyi nî nne mashika anyi ne luuya, nênkutwîlè mukana mwanyi.

Bwalu wêwè udi wamba ne: Ndi mubanji, . . . mudivudijile bintu, . . .ncyênà dijinga ne cintu nansha cimwe to, kadi kùyi mumanye ne udi mukengeledi wa luse, . . .mukengi, . . .mupele, . . .mpofo, ne butaka,

Ndi nkubela bwa wêwè kusumba kùndì mêmè ngòlò muteeta mu . . .kapyà, . . .wamòna mwa kwikala mubanji, ne civwalu ciitooke, bwa wamòna mwa kuvwàdikiiibwa, ne bwa bundu bwa butaka bwebe kabumweeki to, ne kulaaba bwanga bwa mèsù pa mèsù ebe, bwa wamòna mwa kumona.

Aba bônso bândì munange, ntu mbatandisha ne mbanyooka; bwa bwalu abu ikala ne lukunukunu, ne nyingalala.

Mona, ndi mwimane ku ciibi, nkookola; muntu kanà yónsò yéyè muumvwe dîyi dyanyi, ne muunzulule ciibi, nêmbwelè mùdiye amu, ne nêndye nende didya dya diloolo, ne yéyè neadye naanyi.

Ewu udi ucimuna nêmmupèèshè bwa kusòmbayè . . . nêngênzè bwa kusòmbayè naanyi mu nkwasà wanyi wa butumbi, anu mùndì paanyi mucimune, ne musòmbè ne Taatù wanyi mu nkwasà wende wa butumbi.

Ewu udi ne maci, ùmvwè cìdì Nyuma wàmbila maekleeziya.

67 Ne mitu yetu miinyika, ne myoyi yetu, tusambilaayi.

68 Mukalenge Yesu, tudi tuKusakidila mu dinda emu, Nzambi wetu wa ngàsà ne wa ngiikadilu milenga, wàkabiisha Mukalenge Yesu ku bafwe, ne muMuleeje kutùdi mu dinda emu awu, mu mmwenekelu wa Nyuma Mwîmpè, udi wambisha myoyi yetu bwa lwendu lwa sheemàsheemà Nende awu. Bwa ne, bu mutùdì tumona dituku dyenda diseemena ditangile ku ndekeelu, abidi mmale asatu mmîpì dituku dya cikondo nedìikalè mpindyewu dyenda dijikila kakese kakese mu Cyendelele. Tukàadi twenda tuseemena pabwîpì ne mwelelu wa mâyi. Tudi mwa kuumvwa mwadi wa mavwala manene a ntutu mitooke awu. Èyi Nzambi wa yààyà, edi's ndìbà dya njuwu, mutwabadi kaaba aka, cikondo cya ndekeelu cya ekeleeziya, cya Laodikiya eci, mutùkaadi twenda tuseemena pabwîpì ne mwelelu wa mâyi emu. Nenku mabanji ne bintu bya pa buloba ebu mbifofomije mèsù a bantu. Kaa, tudi tulomba's, Nzambi, bwa lwongò lwetu lwashaalaku kacya lwakwata mu Lubwebwe lwa bikondo, bwa kwindila kabundubundu. Enzaku nanku, Mukalenge.

69 Beeneshaku nkwaka wa Nzambi ewu, wùdibò babiikila ne ndyâpà dya Beena Kantu-ku-Byanza bàà Evanjeeliyo mu Kaabujima ewu. Tudi tulomba bwa Wabèneshakù sungasunga

dyâpà dya muneemu mu Tucson edi. Swaku bwa didyunde mu mushindu wa bikengela bwa Ramada ewu kuupulaye bimanu ebi ne kwalabajaye ntenta wende, bwa kupetaye mwaba wa bunene bukumbane bwa kwakidila beena Kilisto balediibwe cyakabidi bààbwelamu abu. Enzaku nanku.

⁷⁰ Beneshaku mwaneetu udi ulwa ne ditabuluja, mwikàle ne ntenta mu cimenga emu awu. Swaku bwa ciikalè cyamu cya mudimu bwa kubweja misuuka mu ekeleeziya eyi ne—ne mu Bukalenge bwa Nzambi.

⁷¹ Beneshaku Mwaneetu Bethany, ku Première Assemblée kwaka, pàdiye utungunuja mudimu wende munene kuntu kwaka bwa Bukalenge bwa Nzambi apu, Mukalenge. Mushindu mwine wutùdi tulomba bwa Wèwè kutungunukaku nende ne ekeleeziya ya mu ditunga dijima's we.

⁷² Mpindyewu patùdi baKwindile Wèwè apa, swaku bwa Nyuma Mwîmpè atupeesheku dyumvwija, ne atwaleku luumvu lwa kubala eku, bwa kucitookesha, bwalu tudi tulomba nunku mu Dìnà dya Yesu. Amen.

Nudi mwa kusòmbaayi.

⁷³ Nukaadiku biimane bwa kwelangana meeji, katanci kakese cyanàànà, bwa ne ewu mmufwanyine kwikala musangu wetu wa ndekeelu wa kudisangisha anyi? Nudiku bamanye ne nkufwanyine kwikala bamwe bàà kutùdi kaaba aka, bu twètù mwa kwalukila cyakabidi dituku dya kudisangisha dyàlondà, netwikalè, bamwe bàà kutùdi, bapangike anyi? Katwena bamanye ne ncinyi cyènzekà to. Ne dibà adi ewu's ùdi mwa kwikala wetu musangu wa ndekeelu wa kwikala basòmbe mu cisumbu mushindu ewu, ne baswikakane ne tudiila pamwe, pa buloba ebu.

⁷⁴ Kadi vulukaayi ne, nekulwe cikondo citwasangila cyakabidi, ku . . . kakùyi ku—kakùyi ku didya dya dinda to, kadi ku didya dya diloolo, kaa, kwikalà didya dinene dya mikùùkùkù dya Nzambi, ne dibaka dya Mwânà wa mukooko, ne nkwaswa minene mmyalabaja kwangacila anu ku ntengu too ne ku ntengu kwa maulu, ne bapikula bàà bikondo byònsò basòmbe dyamunu ne dyamwamwa dya meesa batangilangane. Aci's neciikalè cikondo cya butumbi. Mémè ndi mwindile cyôci aci.

⁷⁵ Mpindyewu, ndi muswe kwangata cyena-bwalu mu dinda emu, bwa kwakulaku neenu, anu bwa tusunsa tukese cyanàànà mpindyewu. Ncyakunulama ntanta mule kutamba mùndi mwa kucyenza to. Ndi muswe kuyiikila. Ndi ne ndambu wa Mifundu ne tuntu tufunda kaaba aka, bìndi muswe kwakwilapu, bwa tusunsa tukese, pa cyena-bwalu cya ne: *Ciibi Munda Mwà Ciibi*.

⁷⁶ Mpindyewu, ewu mmwenekelu wa pabwende menemene, utùdi tumona mu dinda emu, mu kubala kwa Mufundu wetu eku. Ngwa pabwende mu mishindu yàbùngi. Bwalu, wùmwe wa ku Mifundu yidi yitamba kwenza luse yidiku mu Bible,

m’Mufundu ewu ewu, bwalu Wùdi wàkula bwa cikondo citùdi twètù ne mwoyi eci. Wùdi wàkula bwa mwaba, mu cikondo eci, wùdi Yesu Kilisto mwipaciibwe pambelu pàà ekeleeziya Wende Yèyè mwine, ne mwimane, ukookola ku ciibi, uteeta bwa kwalukilamu. Kadi mabanji ne bisankasanka bya pa buloba ebw mbiMupatule pambelu pàà ekeleeziya, mu mushindu wa ne ekeleeziya ukaadi mushaale anu wa civumvu. Ncimfwanyi cya cyenza luse lwa kacya, cya ku ekeleeziya mikwabo yònsò mu bikondo bya ekeleeziya.

⁷⁷ Ndi mfuma ku dijikija dibikenketa ku ekeleeziya wanyi. Ne pàndi ngaalukila mpindyewu, ndi mbangila ku dya 17, bwa kwangata Bitampi Mwandamutekete.

⁷⁸ Nenku mpindyewu, mu cyòci eci, tudi tusangana ne ekeleeziya mikwabo yònsò mu bikondo bya ekeleeziya yivwa miiatabe. Kadi cikondo cya ndekeelu cya ekeleeziya, cya Laodikiya, Kilisto ùvwa muumushiibwe munkaci mwa bantu. Ne bàvwa baMupatule pambelu pàà ekeleeziya, ne Yèyè ùvwa uteeta bwa kwalukilamu, paanyima pàà mumane kwediibwa pambelu, mwikàle ùkookola ku ciibi. Balwè bampofu . . .

⁷⁹ Citàmbe kwikala cya pabwaci, kadi, nudi bamanye’s, misangu mikwabo mu bintu bya pabwabi mmùtù Nzambi umwenekela. Nzambi ùtu umwenekela mu bintu bya pabwabi bwalu Nzambi ùtu wa pabwende. Yèyè ùtu wenza bintu bya pabwabi. Yèyè ùtu umweneka mu bikondo bya pabwabi. Ne Yèyè ùtu wa bamona mu bikondo bya pabwabi, mu bikondo byùdi kuyi mufwanyineku kwela meeji ne Yèyè mmufwanyine kwikalaku abi, kadi pààbì, Yèyè mwikàlekù. Wa pabwende menemene. “Yèyè ùtu wenza maalu mu mishindu yidi kayiyi yumvwika to,” mùdi Bible mwambe, “wenzu maalu Ende a kukema.” Ki bwa cinyi, aci cìdi ciMuvwija wa pabwende.

⁸⁰ Nenku ki mushindu ngwòwù awu. Twètù tutu tubwela mu mmwenenu wa ciibidilu wa maalu, kadi tupangila Nzambi. Cya pabwaci ncitù misangu mivule citwala Nzambi ku bantu, bintu bya pabwabi abi. Cintu kampanda, twètù tutu tutamba kuswikiibwa mu twitabaayi kampanda, anyi cintu kampanda citùdi tuteeta kukwacila mudimu. Ne dîbà adi bintu byònsò byòbì kabiyi bilwe bilondeshile mushindu wutùdi twètù twela meeji ne ki wùvwàCi cifwanyine kulwa awu to, dîbà adi tudi—tudi tuCyela ku luseke. “Cìdi—kî n’Cya—kî n’Cya kùdi Nzambi to.” Tudi twenza ntupakanyi mibi mitambe.

⁸¹ Nzambi ùtu ùDileeja, ne pashiishe ùDisokoka mu cintu anu cyòci cimwecimwe mùdiYe ùDileejila amu. Nwamonu anyi? Yèyè neaDileejile mu cintu kampanda, pashiishe utapuluka kadi kuDisokoka.

⁸² Anu mùdi dimiinu amu, Yèyè ùdi ùDileeja mu cilongò cilenga, pashiishe Ùcilekela cìbola. Kadi Yèyè ùdi ùDisokoka, bwa kupatuka cyakabidi. Nenku Nzambi ùtu ùcyenza mushindu

awu. Yèyè ùtu wa pabwende menemene, bikondo bya pabwabi, mishindu ya pabwayi, ne, mingà misangu, tuntu twa tukese.

⁸³ Twètù tutu—tutu—tutu tupangila kupeta Nzambi misangu mivule bwalu bidi ne, tutu twela meeji ne, nkapitepite bukesa.

⁸⁴ Mvwa ngeela meeji pa bwalu abu mu tusunsa tukese emu, patùvwà twakula pa bukesa bwa dyàpà edi, anyi bukesa bwa musùmbà wa bantu wutùvwà naawu. Mpindyewu, nkaadiku mupete dyèsè dya kwakulaku ne misùmbà kampanda minene ya bantu. Bombay, mu Inde mwamwa, mvwamu ne binunu nkama yitaanu, mu disangisha dimwepele. Mu Afrike, Afrike wa ku Sud, biipacila, pàmwàpa binunu nkama yibidi ne makumi ataanu ku disangisha dimwepele. Kadi myaba yinkaadiku musangane bitambe bulenga ne bitambe kubeneshiibwa bya bipite yònsò, mpatùvwà ne masangisha makea a milombo a mu tuzùbuzubu. Nzambi ùtu mu mwaba wa pabwawu ne mu bintu bya pabwabi.

⁸⁵ Cidi cimvulwija, bu mùdìbi ne mwena Canada ewu ùvwa wàkula mwab'ewu mu tusunsa tukese emu, wàmba bwa balunda baanyi balenga bàà ku Canada. Kukaadi cikondo kampanda Mfumu George ùngààkapetelàku dyèsè dya kusambidila awu, bu munùdì bamanye, ùvwa ne dĩaamà dya nkàkà mupite bùngì awu. Mukalenge kumwondopaYe. Nenku yèyè wakalwa ku Canada pàcivwàye ùsaama diine dĩaamà dya nkàkà edi. Kadi ùvwa muntu wa bukutu's. Ne bilongelu byònsò byakapatula balongi paakapicilaye mu Vancouver, bwa—bwa baamonaku mwa kuya kangata byabo. . . Bāvwa babapeeshe kaadibendela kakese, kàà ci-Britanike, ne—ne—ne kukàpeepa, bwa kupa Mfumu awu luumu, luumu kùdì bukalenge, pāvwaèye upicila mwaba awu apu.

⁸⁶ Nenku mulunda wanyi wa katàpùlà-katèèkà, Mwaneetu Ern Baxter, patùvwà munkaci mwa kuciteejila ku tudyomba pāvwaèye cìpita apu, yèyè ne mukalenge—mukaji wende mulenga awu basòmbè mwaba awu. Kadi twètù tuvwa basòmbèle mu cibambalu amu, ne mèmè ncyadyakucipwaku mwoyi to. Kwenzekabi bu bitambè kupicila Ern mu mushindu wa ne yèyè wàkakàtamuka lubilu mu nkwasà e kungeelaye citupà, kukùtulaye mwadi wetu wa binsonji ewu. Ki mèmè kwamba ne: “Disaluka dyònsò edi ndya cinyi, Mwaneetu Baxter?”

Yèyè ne: “Mwaneetu Branham, s'mmfumu wanyi mèmè's.”

⁸⁷ Mèmè kudyambidila mundamunda ne: “Piikalàci mwa kufikisha mwena Canada ku didyumvwa mushindu awu, pa kumanya ne mfumu wende wa ditunga nguvwa upita awu, bivwa bikengela kwenzelaci Ekeleeziya mulediibwe cyakabidi cinyi, pààsà Yesu lwendu bwa kupicilapu?”

⁸⁸ Mwaba awu, pààbì, mucikàle ne dĩaamà dyende dya nkàkà mupite bùngì adi, musòmbè mu ditempu dyende adi, kadyendelandela kende aku, kadi mwimane musulame, nansha

mùvwàye wàmba ne ùvwa usaama bikole menemene ne byùja, ne nyima umutacisha bibi menemene amu.

⁸⁹ Nenku balongeshi baakapatula bânà bakese bônso pambelu, bwa kuyabo kapeepa tuumabendela atu. Kadi paanyima pàà lwendu lwa mindololoooci alu—alu lumane kujika, mona's, bânà bàvwa ne cya kwalukila mu tulaasa. Kadi pààkaalukilàpo apu, mu cilongelu kampanda, bônso kwalukilabo pa kuumusha mwânà mukese umwepele wa bakaji. Ki mwoyi wa mulongeshi mukaji kulubakanawu paakabiikilaye mênà a balongi kadi mwânà mukese wa bakaji awu kàyikù to. Pa nanku kwambaye ne: “Ndi ne cya kuya kamukeba,” nenku—nenku kwangataye bânà abu. E kuyabo mu misèsù, benda bakebangana ne mwânà mukese awu. Ki paanyima pàà katanci, mulongeshi mukaji awu yèyè mwine kusanganaye kakwacikwetu aku, kiimane ku luseke lwa dikunji dya nshinga ya bikolokolo, kafwile anu mu mwadi ne mwoyi mukàshìikile.

⁹⁰ Nenku pàvwàye ùdila apu, ki mulongeshi kwambaye ne: “Mbwalu kaayi's, munanga wanyi?” Yèyè ne: “Kwèna mupete mushindu wa kupeepa kaadibendela keebe kùdi mfumu anyi?”

Yèyè ne: “Eyo, ndi mupeepe kaadibendela kaanyi kùdi mfumu.”

Awu ne: “Uvwa mufike ku dimona mfumu anyi?”

“Eyo, ndi—ndi—ndi mumone mfumu.”

“Ee,” mwakambaye, “kadi cyùdi udila ncinyi?”

⁹¹ Kwambaye ne: “Udi mumanye's, ndi mwìpì be. Mwawa mumone mfumu, kadi yèyè kí mmumone mêmè to.”

⁹² Mpindyewu, aci ncifwanyine kwikala nanku's, bwa Mfumu George anyi mfumu mukwabo kanà yónso ewu, kadi kabyena nanku bwa Mfumu Yesu to. Disangisha didiYe mukupeshe bwa kwikala mpaasata nansha dyôdi dikese munyi; nansha mudimu wùmweka mukese munyi, mùdi anu kwakula cyanànà ne mupaanyishi wa mabeele anyi ne nsongaalume mupaanyishi wa bibejibeji; Yèyè neacimone. Kwèna mwa kwenzela Yesu cintu nansha cimwe Yèyè kàyi ucimanya to. Wèwè udi ne cya kuvuluka ne, Yèyè mmumanye kantu kakese kónso kaùdi wenza aku, ne Yèyè neakupe luumu lwónso alu, bwalu cyôci aci ki cidìbo bakutumine díyì bwa kwenza. Nansha cyôci cikese cya bishi, ùcyènzè, nansha bishi. Wèwè muswe kupeepa kaadibendela keebe kakese aku, kàpeepè. Yèyè ùtu mu cintu cya pawwaci aci. Yèyè mmufwanyine kupetaku musuuka kampanda.

⁹³ Ngeela meeji ùvwa n'Dwight Moody. Anyi ndi mutupakane anyi? Pàmwàpa kàvwa nyèyè to. Mwaneetu wa bakaji mukulakaji ùvwa ne bujitu pa mwoyi wende, bwa mwikàle ujinga kupetelaku Kilisto musuuka. Kadi yèyè ùvwa musukwidyanganyi wa bilàmbà. Kukaadi bidimu lukama ne makumi ataanu, ngeela meeji. Nenku wàkabùta tufranga twende

too ne mwakakumbajaye ndola yisatu. E kufucilaye nzubu wa kale wa dilamina tubalu ku ndola umwe ku lumingu. Nenku kuyaye kuntwaku, kudikolopelaye yêyê mwine muntwamu. Ki kwangataye cibasa cyende cya disukwilapu bilâmbà aci e kucivwijaye cyoshelu, ne kuteekelaye cyambilu kuulu aku. Ne—ne ntutu yicivwa anu pa cibasa cya kale cya disukwilapu bilâmbà aci. Kadi—kadi yêyê kwangata ndambu wa tu-tracts ne kubangaye kutwabanyinangana. Aci civwa mmu matuku a kale a ntwadijilu mu Amerike emu. Kadi muntu yônsò uvwa utângila ka-tract aku, ùvwa ukiimansha panshi. Kwenzekabi ne mukaji awu ùvwa Méthodiste. Pa nanku bôbò bàvwa anu bàkiiimansha—bàkiiimansha panshi.

⁹⁴ Nenku ba-Méthodistes musangu awu bàvwa anu mùkaadi beena Mpenta emu: musumbà wa bakoleshi bàà maalu. Bàvwa bàshààla mu nzubu ya tulaasa, ne bapona panshi, ku bukole bwa Nzambi, ne babapongolwela mâyi mu mpala. Kadi kungambidiku wêwê to; mêmè mvwa mu masangisha mene awu. Nwamonu anyi? Kadi bu bôbò anu babalekeleku mu ditalala, pamutu pa kubaaluja cyanyima, bu nansha babalekele anu batungunuke, nunku mbalwe beena Mpenta. Nudi numona anyi?

⁹⁵ Kadi, pashiishe, mukaji mukulakaji mukwate ne bya luse ewu wenda wabanyinangana tubeji twa dibala atu, kadi, to, bantu bônsò bàvwa batwimansha anu panshi mu musèesu amu. Kadi kùvwa . . . Yêyê ùvwa mwimane, ùdila mwadi, bwalu bàvwa bamubenge, pàvwàye muteete ne mwende mwônsò bwa kuvwijaku mwambi kampanda mu cimenga amu, bwa kwenzaye ditabulujaja adi. Kadi mwambi mwine awu bìvwa bikengela amweneke diloolo adi. Mukaji awu ukaavwa umuka bwa kuya. Kadi kulwaku mwânà wa balume mukese muvwàle bya tatwëndè . . . Mwamwa mu Sud, tutu tubibiikila ne “mampindà,” nudi bamanye’s. Muvwàle mampindà, nsuki misaasulukangane mipweke mimufikile ne mu nshingu, kuseemenaye e kwamba ne: “Hê, inâbânzà, byûdì wabanyinangana mbinganyì?”

Ki yêyê ne: “Nkakanda kàà dibala’s, munanga wanyi,” mwakambaye.

“Ee,” yêyê ne, “mêmè ncyênà mumanye kubala to.” Yêyê ne: “Mbambemu cinyi?”

⁹⁶ Ki yêyê ne: “Ee, netwikalè mwa kwenza disangisha ku nzubu wa kale wa dilamina tubalu kwaka diloolo edi.”

Yêyê ne: “Twasakidila. Ndiku mwa kupeta kamwe anyi?” mwakambaye.

“Eyowa’s.” E kukeelaye mu mpaaya.

⁹⁷ Pààkenzekà disangisha adi diloolo adi, nudi bamanye ne nganyi uvwamu? Mpaasata wenu mukulumpe wa lulamatu awu, ne inâbânzà awu. Ki bônsò bàvwàku mu disangisha adi mbôbò abu. Disalaayi dya bukutu dya kale adi, nansha kwôkò muntu umwepele anyi bantu cinunu, kwangataye mufundu wende,

kwimanaye mwaba awu e kuyiishaye inábànzà awu, anu ne lulamatu ne mwende mwônsò byenze bu ne ùvwa uyiisha bantu binunu dikumi. Wâkalwa mu ciibi amu wenda utetuka nganyi, pâkaavwà diyiisha dyâmba kubanga apu, s'ùvwa mmwânà wa balume mukese wa nsuki misaasulukangane awu. Diloolo adi kusanganyibwaye anu nkaayende ku cyoshelu's. Mêmè nciyi mutupakane to, kàvwa nka-Dwight Moody aku, kààkafikishà cyabibidi cimwe cya mùliyò wa misuuka kùdi Kilisto aku. Nwamonu anyi? Kaa, ekelekele! Búngi bwine bwa masangisha manene ne bintu bilengeja ne bilòngò bìvwà munkaci mwa kwenzeka's we! Nwamonu anyi?

⁹⁸ Nzambi ùtu mu bintu bya pabwabi. Nzambi ùtu umweneka wa pabwende. Nudi ne cya kuvuluka aci.

⁹⁹ Mpindyewu, ncyênà mwa kuvuluka ne muzodi wâkazòla cimfwanyi eci ùvwa nganyi to, cya Yesu mwikàle ukookola ku ciibi eci awu. Mmuzodi kampanda wa cyena Ngelika. Ncyênà anu mwa kuvuluka dînà dya mwabilaayi awu patùdi twakulangana apa to. Kadi yêyè wakapicisha pamwe ne matuku ende ônsò a mwoyi, uzolangana anu ne cimfwanyi eci. Kadi, nudi numona's, kumpala kwa kucikudikabo mu cibambalu cya luumu, bikengela cyânji kupicila dyambedi mu cibambalu cya badyûdi. Nenu cimfwanyi cinene cyônsò cidi ne cya kwenza nanku. Cidi ne cya kusanganyibwa kumpala kwa badyûdi.

¹⁰⁰ Kaa, mvwa njinga ne ngîkalakù ne—ne cintu kampanda cidi cinkengela bwa ngaamônakù mwa kuleeja bateeleji aba bwalu ebu mu dinda emu's. Nudiku nufika ku dyumvwa, nwênù beena Mpenta, patùdi twenda tukwacika mashika apa, ne Nzambi mmutupicishile mu cibambalu cya badyûdi leelu ewu anyi? Bikengela bwa Ekeleeziya apicile mu cibambalu cya badyûdi kumpala kwa kumonaYe mwa kuya mu cibambalu cya luumu, bu Mukaji-musela. Cya bushuwa. Udiku wêwè mwa kucitwala anyi? Udiku mudilongolole bwa kufila dyandamuna ku Mifundu, ne kushaala mwimane ne bukito ku bujaadiki bwebe mu dinanga dya Kilisto anyi? Udi munkaci mwa kwalukila cyanyima, upatuka pamwe ne bàà pa buloba anyi? Mùdi Bible mwambe ne: “Demààsà mmundekele, munange maalu a pa buloba a cikondo eci.” Ki mwaba wùdi ekeleeziya mwimanyine leelu wa Ndaaya ewu ngwòwò awu, bamupime mu cipiminu cya bujitu. Ki cidi cyenze ne, alwe Laodikiya ncyôci aci.

¹⁰¹ Cimfwanyi eci, pàvwà muzodi awu mucizole, paakayaci mu cibambalu cya badyûdi kabaakapeta mushindu wa kusanganamu cintu cibi nansha cimwe to. Ki ndekeelu wa byônsò mudyûdi munene kampanda kujuukaye, e kwambaye ne: “Kùdi cintu cimwe cibi mu cimfwanyi cyebe.” Kwambaye ne: “Ncya bushuwa, Yesu mwikàle ne mwêndù mu cyanza Cyende, ùlwa bufuku mu mîdimà ya mpekaatu. Ncimfwanyi cîmpè. Mmwenekelu Wende ne dindila dya ne muntu kampanda alwe ku ciibi aku pâdiYe ukookola apu,” yèyè ne, “ncilenga cya dikema.

Ne mmwenekelu pa mpala Pende, pàdìYe ujinga ne mwoyi mujima bwa kuumvwaku bandamwina munda mwamwa. Kadi, mukalenge, kakwena kâlê ku ciibi to. Bu Yèyè mwa kulwa, mmunyi mùvwà Yesu mufwanyine kubwela, bwalu nyawu kakwena kâlê ku ciibi?”

102 “Kaa,” mwàkambà muzodi awu, “ndi mucizole mushindu awu, bwalu kâlê kàdi kàsanganyibwa munda. Yesu kèna mwa kubwela anu ku Dyende diswa to. Bikengela ciikalè diswa dyebe wèwè bwa kuMubwejamu.”

103 “Mona, Ndi mwimane ku ciibi nkookola. Muntu kanà yònsò yèyè muumvwe Díyi Dyanyi, ne mubwele. . . muMbweje, Nèmbwelè ne Nèndye nende didya dya diloolo, ne yèyè neadye Naanyi.”

104 Ki cimfwanyi citùdi twètù tutangila ncyòci aci mpindyewu. Muntu ùtu ukookola ku ciibi bwa cinyi? Cìdi cisàka muntu bwa kukookolaye ku ciibi ncinyi? Ùdi uteeta bwa kupetaku pàà kubwelela. Ùdi ukeba kubwela. Mwaba awu. . . Pàmwàpa kùdi bwalu kampanda bùdiye muswe kuyiikilangana neebe, anyi pàmwàpa mmuswe kuyiikilangana neebe pa maalu a bungèndààmùshìngà anyi cintu kampanda. Anyi—anyi, pàmwàpa mmuswe kukupeesha cintu kampanda. Kùdi anu kabingila kampanda, bwa cyanàànà kàvwa mufwanyine kwikala ukookola ku ciibi aku to. [Mwaneetu Branham ùdi utuuta bintu pa cyambilu—Muf.] Nwamonu anyi? Tudi bafwanyine anu. . .Nsòmbelu wetu wa buntu wa maalu a kaneemu ewu’s mmufwanyine kwikala anu wa kuunzulula ciibi ne kumona ne cìdi muntu awu ukeba ncinyi. Aci’s cìdi anu cintu cyetu cya buntu eci cìdi cikèngelà kwenza: kuunzulula ciibi, kwebeja muntu awu ne: “Wèwè ùdi nganyi? Udi ukeba cinyi?”

105 Mmuswe pàmwàpa, yèyè, mmuswe kukukumbula, bwa kusòmbelakù anu panshi, kwamba ne: “Mémè ndi mulunda webe. Ndi muswe kuyiikilanganaku neebe katanci kakese cyanàànà mu dinda emu.” Pashiishe kusòmbela panshi, piikalàye mulunda, kuyiikilangana nende. Piikalàye muntu kampanda wa ukeba cintu kampanda kùdi, s’nudi bafwanyine kuciyiikilangana bwa kufika ku dipetangana. Nwamonu anyi?

106 Bantu banene bààbùngì bàkaadi baakookolekookole ku biibi, mu nsòmbelu mwònsò emu. Mpindyewu, paanyima pàà wèwè mumane kuya ku ciibi aku, misangu yàbùngì, mbilondeshile ku ne mwine udi ukookola awu nganyi. Bikengela umanye ne mwine udi ukookola awu nganyi. Kadi bìvwakù bikengela ne, wèwè, wánjì ùyekù kwine ku ciibi aku’s. Ki cintu cimwepele cya nsòmbelu wa kaneemu cya dyenzaku, ncyà kujingulula ne mwine udi ku ciibi aku awu nganyi. Uyaku, piikalà muntu kampanda ukookola, wàmba ne: “Nganyi awu?” Unzulula ciibi. “Wèwè udi nganyi? Udi ukeba cinyi?” Kaa, bààbùngì—bààbùngì, s’mmufwanyine kwikala muntu munene

kampanda. Amba tũng bu yêyè mwa kwikala muntu munene? S'ncifwanyine kwikala luumu lunene bwebe wêwè, bu wêwè mwa kuunzulula ciibi bwa muntu kampanda mwikàle muntu munene.

¹⁰⁷ Nudi nwelaku meeji ne ncinyi cìvwà mwa kwikala cyenzeke, kukaadi ndambu wa bidimu, pàvwà Adolf Hitler mwikàle Mulombodi wa Allemagne apu? Nudi nwela meeji bishi bwa kakwacikwetu kampanda kasòmbèle lwà kwinshi kwa kajila kakese eku, anyi kwinshi kwa musèèsu eku mwaba kampanda, bu yêyè mwa kuumvwa bakookola ku ciibi dinda kampanda, nudi bamanye's. [Mwaneetu Branham ùdi utuuta bintu pa cyambilu—Muf.] Ne kuyaye ku ciibi, kadi ki muunzulwidyanganyi wa ku ciibi mukese wa beena Allemagne ewu mwimaneku, ne ki Adolf Hitler awu mwimane ku ciibi aku? Mona's, yêyè's nguvwa muntu mutambe bunene wa mu Allemagne mu cikondo kampanda. Nwamonu anyi? Cya bushuwa's. Kaa, yêyè's ùvwa muntu munene.

¹⁰⁸ Nudi bamanye cìvwà muunzulwidyanganyi wa ku ciibi mukese awu mufwanyine kwikala mwenze anyi? Nunku's mmwambe kuuminyina. Nunku's mmushaale musulame, mukose mpala mu mushindu wa cyena Allemagne awu, mwambe ne: "Mulombodi munene wa Allemagne, bwelaaku mu nzubu wanyi mupwekele ewu. Cyònsò cyùdi naaci dijinga muntwemu aci, cyònsò cidì musadidi webe mwa kwenza aci, ngambilè wêwè anu cyanààna. Nèncyènzè ne disanka dyònsò." Kaa, luumu kaayipu's we!

¹⁰⁹ Nudi bamanye mùdi bwalu anyi? Cibejibeji kanà cyònsò cya mu Allemagne nunku's nci tangalaje bwalu abu, bwa ne Adolf Hitler munene awu mmupweke muye ku nzubu kwa musalaayi diikidì, mukakookole ku ciibi ne mulombe cintu kampanda. Ne Hitler awu ùvwa mufwanyine kulomba cintu kampanda kùdi muunzulwidyanganyi wa ku ciibi, mufwanyine kulwa kumbelu kwende, ne—ne mupeeshe nzubu wende aawu luumu, ee, cintu bunene kaayipu cìvwà' kwikala cyenzeke's we! Ncinyi, ne . . .

¹¹⁰ Bu ne wêwè uvwa mu Italie, mu matuku a Mussolini. Ne Mussolini awu's ùvwa mfumu wa cimbàmbilà wa—wa—wa Loomo, wa Italie. Kadi bu ne muntu mupele kampanda mu musèèsu ùvwa muumvwe bakookola ku ciibi mu dinda kampanda? [Mwaneetu Branham ùdi utuuta bintu pa cyambilu—Muf.] Kadi ki Mussolini udi mwimane ku ciibi wawa. Kaa, ekelekele! Nunku myoyi yabo's mmizakale ne: "Ee, mfumu munene wa cimbàmbilà, mukalenge munene mwende luumu, bwelaaku mu nzubu mwanyi." Ùzakala ne womba cikàcikà ne: "Ncinyi—ncinyi cìndiku mufwanyine kwenza? Kùdikù cintu kampanda kaaba aka cyùdi—cyùdi naaci dijinga anyi? Kùdikù cintu kampanda cidì musadidi webe mwa kukwenzela anyi?" Kaa, nunku's nduumu lunene kùdi mwena Loomo kanà yònsò ewu bwa kwikala mwakidile Mussolini kwende kumbelu.

¹¹¹ Anyi bu ne mukalenge-mukaji wa Angleterre, leelu ewu, mmulwe muneemu mu Tucson, ne mutuuluke mu ndeke muneemu mu cipalu kampanda cya ndeke, ne mulwe ku lumwe lwa ku mbànzà yetu eyi? Umwe wa ku kutùdì... Twètù's tudi bantu anu beetu bàà ciipanshi aba. Nenku bu ne mukalenge-mukaji wa Angleterre mmulwe ufumina ku Angleterre, mufumine dyamwamwa dya mbû dyàdya, mutuuluke ku cipalu cya ndeke muneemu emu, ku—ku cipalu cya ndeke ne balwe nende mu taxi, ne mulwe kukookola ku ciibi cyebe. [Mwaneetu Branham ùdì ùtuuta bintu pa cyambilu—Muf.] Ne wêwè, inǎbànzà anyi mwena-mwabo wa bàpa buneeme, wêwè mufwanyine kuya ku ciibi ne kwamba ne: “Wetwawu!” Kadi ki yêyè awu mwimane mwab'awu, mwenze anu bu muntu mukaji wetu wa patupu ewu. Ne wêwè mufwanyine kwamba ne: “Wetwawu! Wêwè udi nganyi?”

¹¹² “Ndi mukalenge-mukaji wa Angleterre,” ne mufwanyine kuditeja. Kaa, ekelekele, luumu kaayi! Kaneemu kaayi!

¹¹³ Cibejibeji kanà cyònsò cya mu Tucson, mu États-Unis mwònsò, s'ncifwanyine kucyela mu nguumu ya ditunga, ne mukalenge-mukaji munene wa Angleterre mmwende lwendu lujima mulwe too ne ku Tucson, mu Arizona, mukwendele wêwè, muntu mupele awu. Buneeme bùdìci cifwanyine kusakidila ku bwa mukalenge-mukaji awu, bwa kudipwekesha kwende kwa kulwa ku ciibi cyanyi anyi ku ciibi cyebe aku. Ee, udi mumanye cidiye mufwanyine kwamba anyi? Nansha yêyè kàyi... Wêwè kwèna nansha mwinshi mwa bukookeshi bwende to, kadi nansha nanku yêyè mmuntu munene. Yêyè ngudi mukalenge-mukaji mutambe bunene pa buloba. Baswe kwamba bwa matunga, yêyè ki mukalenge-mukaji wa ditunga udi mutambe bunene bwa buloba bujima. Mona's, wêwè's udi mufwanyine kwikala mwambe ne: “Mukalenge-mukaji wa kuneemekiibwa, bwelaaku mu nzubu mwanyi emu. Kwòkò kwikàle cintu kanà cyònsò mwab'ewu cyùdì ujinga kwangata, cintu kanà cyònsò cyùdì ujinga kwenza, dyũmwè anu ne mbakwakidile bilenga.” Kaa, cya bushuwa's. Nunku bibejibeji byònsò's mbitangalaje bwalu abu.

¹¹⁴ Anyi nansha mene mu dinda emu, mfumu wetu wa ditunga, Kennedy, bu yêyè mwa kulwa ku ciibi cyebe. Kaa, udi mufwanyine kwikala kuyi upetangana nende to, mu maalu a cidiidì, kadi nansha nanku neumulekele ubwela. Bwa cinyi? Kabiya ne mbwalu yêyè ùdì pàmwàpa anu muntu to, kadi mbwa cidiye aci. Yêyè mmfumu wa ditunga dyetu dya États-Unis. Pààbi, twètù, tudi bafwanyine kwikala katùyi tupetangana nende to (mèmè ewu) mu maalu a cidiidì. Kadi, nansha nanku, wêwè's udi mufwanyine kupeeshiibwa luumu lwa kwikala mwakidile Mfumu wa ditunga Kennedy mulwe ku ciibi cyebe.

¹¹⁵ Ambabi tũng bu yêyè mwenze anu lwendu lwa pabwàlù mulwe ku ciibi cyebe? Kaa, s'ncifwanyine kwambiibwa mu

nguumu myaba yônsò ne: “Mukalenge Kennedy mudipwekeshi, mfumu wa ditunga dya États-Unis awu, mmwangate ndeke muye ku Tucson, mu Arizona, bwa kuya ku ciibi cya Kampanda.” Luumu bunene kaayipu lwikalàci bwende yêyè, ne nduumu kaayipu lwikalàci bwebe wêwè awu. Mona’s, kwênàku wêwè mufwanyine kumubengela to nansha bishi. Nansha kakese. Ncya bushuwa ne wêwè udi mufwanyine kumwakidila, bwalu yêyè mmuntu munene.

116 Kadi nganyi udiku mutambe Yesu ku bunene? Kadi Yêyè’s mmwipaciibwe ku biibi byàbûngì kutamba ne bamfumu bàà cimbàmbià bônso ne bamfumu bàà matunga ne balombodi bàà makookeshi maalabale bàà pa buloba. Eyowa’s. “Ndi mwimane ku ciibi nkookola; nenku muntu kanà yônsò yêyè muumvwe Dîyì Dyanyi ne muunzulule ciibi, Mêmè nêmbwelè ne nêndye nende didya dya diloolo.”

117 Kaa, tuumakookola tukese tutùdì tupeta ku ciibi etu. Misangu mivule, Yesu ùtu ukookola ku ciibi cya mwoyi wetu. Ki mwaba wùdì ekeleeziya leelu ewu ngwôwô awu. Tuumakookola tukese atu, nudi nutuumvwa, kakùyì mpatà to, mpindyewu mene. Ncinyi aci? N’Yesu awu, ùkeba bwa kubwela, bwa kupeta mwa kubwela ku ciibi cya mwoyi webe. Yêyè ùdi ne . . . ùdi uswa bwa kuyiikilanganaku neebe bwa katanci kakese.

118 Ne piikalàbi ne udi mufwanyine kupa mfumu wa ditunga luumu, kadi Yesu? Piikalàbi ne wêwè, nansha bya munyi, kwèna mwa kubèngela mfumu wa ditunga to, díbà adi mmunyi mùdì mufwanyine kubèngela Yesu? Mfumu wa ditunga’s udi anu muntu wetu ewu; yêyè’s ùdi ne cya kufwa. Kadi Yesu’s n’Nzambi webe. Yêyè’s m’Mulumbulwishi webe. Kaciyi anu aci nkaayaaci to, kadi Yêyè umwèumwè awu, udi Mulumbulwishi webe awu, ngudi mpindyewu Musungidi webe.

119 Mpindyewu, mfumu wa ditunga mmufwanyine kuswa bwa kukutumina dîyì bwa wêwè kuya mu Cilwilu. Mmufwanyine kukutumina dîyì bwa—bwa wêwè kwenza cintu kampanda cidì cifwanyine kwikala cibi be bwa kwenza. Yêyè mmufwanyine kukutumina dîyì, anyi kukunyenga cintu kampanda, kwangata bânà beebe anyi cintu kampanda, bwa kwikalabo basadidi bende yêyè anyi cintu kampanda. Mmufwanyine kwenza cintu cya mushindu awu.

120 Kadi Yesu kàtu muswe aci to. Yêyè mmuswe kukupeesha wêwè cintu kampanda. Ki bwa cinyi Ùdi ukookola. Yêyè ùdi ne cintu kampanda bwebe wêwè. Kakwenaku cintu nansha cimwe cidì cifwanyine kwikala cinene citambe cidìYe muswe kukupeesha aci to: Nyuma Mwîmpè. Yêyè mmuswe kukupeesha Mwoyi wa Cyendelelee.

121 Kadi bu ne mfumu wa ditunga ùvwa mwambe ne: “Nèngènzè. . . Ndi mulwe bwa kukwangata, ne ndi ne bukookeshi bwa kwenza nanku, ne kukuvwija mfumu wa

ditunga dya États-Unis”? S’nebikengele bwa wêwè—wêwè kucishiya dîngà dituku. Kadi bu ne mukalenge-mukaji ùvwa muswe kukuvwija mukalenge-mukaji wa Angleterre, bwa wêwè kwasa cifulu cya butumbi? Aci, s’nebikengelè bwa wêwè kucishiya.

¹²² Kadi Yesu’s ùdi utupeesha cifulu cya butumbi cya Mwoyi, citùdi katùyikù tushiya to, cifulu cya Butumbi Bwende cìdì kacìyi cinyangukaku to. Ne kabyena bikengela bwa twètù kuCishiyaku to. Yèyè ngudi utupeeshaCi. Ndibenesha. N’Nyuma Mwîmpè, udiYe muswe kutwa nende cishindaayi ku nsòmbelu wetu.

¹²³ Mmunyi mutùdì mwa kushaala katùyi tucyuka myanda, bwa kuCibenga? Bintu bya macimbu kaayipu bidì ekeleeziya wenza’s we! Mushindu mwine wùdì bantu mwa kwikala bacimbakane’s, bwa kwenza cilema bu nanku, bu cya kubenga kuteeleja dikookola dya ku ciibi adi. [Mwaneetu Branham ùdi ùtuuta bintu pa cyambilu—Muf.] Mushindu mwine—mwine wùdici cifwanyine kwikala cya mutu munyunguluke bwa mulume anyi mukaji kanà yònsò ewu, udi kaaba aka mu dinda emu ewu, bwa kwepela dikookola adi, Mwoyi wa Cyendeleele!

¹²⁴ Pèètù’s tudi tutangila ne tumona mavuba a cilumbulwidi enda adivunga, pa kuumvwa maalu a mamanya amba ne: “Nkushaale tusunsa tusatu bwa dibà mundankulu kukumbanadi.” Kadi pabwîpì ne tubidi twa ku twine tusunsa atu’s tùkaadi tupite. Aci’s ncyà kùkaadi bidimu mulongolongo.

¹²⁵ Ne tudi tumona ekeleeziya mutangalake. Tudi tumona bintu byònsò byenda bitungunuka, mushindu wùdibi ewu, ne dingumba dibanga kushaala dingumba, dikwacika dya mashika. Ne matuku a ditabuluja akaadi amba kujika, mbyenze bu ne, ajiki. S’mbipiciibwe ne twètù bakungamangane ne bulelela. Kaa, tudi ne mutooyi bûngì cyanàànà, cya bushuwa’s, twimba piano, tutupika muulu ne panshi. Bakaji bakosa nsuki yabo, ne mèsù a bleu, ne batungunuke, ne balume babalekela babyenza! Aci’s ncibengangane ne Mifundu.

¹²⁶ Cintu cya umona cikwendesha ne ku mwoyi patùdì mene tumona mu misèsu yetu leelu ewu! Mwya mwangate bânà baanyi makeelela awu, tuvwa baswe bwa kuya kabandilaku beana mu ditembangana dya mamanya a mwa kubànda pa tubalu pavwabu munkaci mwa kupita; bânà baanyi bàà bakese. Tatwányi mêmè ùvwa mubàndi wa pa kabalu, ne mêmè—mêmè nkaadiku mwenze ndambu wa dibàndà dya pa kabalu, nenku bidì anu munda mwabo amu bwa kunanga tubalu. Nenku bàvwa baswe kumona tubalu. Kadi ndi mwenze anu ngiimanyina mu musèsu, mêmè kuumvwa binsaama too ne mu kandondo kàà munda mwanyi nenku mêmè kwalukila, pa kumona mushindu wùdibi ne, bantu leelu ewu, bàdi bateeta bwa kwikala ne

nsòmbelu wa matuku a kale, bateeta kwikala ne nsòmbelu wa cintu kampanda civwàku kale wawa.

¹²⁷ Tudi pa buloba bùdì munkaci mwa kushintuluka. Bùdì bushintuluka díbà dyònsò, kwetu. Mémè ndi mwena Kentucky, nudi bamanye's, ku dilediibwa. Mbwenwa kwamba ne, bàà kwetu bònsò mbasòmbèlemù, ciibwípì ne bònsò. Ne bàtu ne Renfro Valley. Bàtu bateeta kutentula bantu bàà ku mikuna, ne—ne bateemesha myëndù ya pitùloolù, ne—ne biipikila pa—pa macyuwa a nkunyi, ne bàvwàla bilàmbà mùvwà bantu baa—bàà ku ncyàmà bàvwàla amu. Bàdi—bàdi pa buloba bùdì munkaci mwa kushintuluka, bateeta bwa—bwa—bwa kwikala ne nsòmbelu wa mu—mu. . . Nwènu nusanganyiibwa pa buloba bwa cyena-leelu, nuteeta bwa kwalukila paanyima ne kwikala ne nsòmbelu wa cintu kampanda cishiilangane civwàku kale. Cidì cifikishà muntu ku dyenza cyòcì aci ncinyi? S'mbwalu ùdì ne cya kwenza nanku.

¹²⁸ Kadi díbà adi paùdì uteeta bwa kubatwadila Evanjeeliyo utu kàyikù ushintuluka awu, bòbò kí mbaswe aci to. Mbaswe cintu kampanda cya cyena-leelu ne cya leeluleelu, muntu kampanda wa ubatuuta tuumapi pa mwongo ne ubalekela kabàyi banyookiibwa anu pa kushaala bàà mu ekeleeziya, ne biikàle ne nsòmbelu wa mushindu kanà wònsò wùdìbo mwa kwikala baswe awu. Kadi pàkaadìbi bwa kwalukila bulelela ku Evanjeeliyo, kí mbaciswe to. Kadi cintu mene cidì munda mwabo cidì ne nzala ya kwalukila aci, s'ki Evanjeeliyo. Kadi bàdi bateeta bwa kucisankisha ku dyangatulula dya bintu bya mubidi, nenku babenga bintu bya nyuma. Nudi numona mùdì dyabulu ucyompakajila bantu Evanjeeliyo awua—awu anyi?

¹²⁹ Kabiyo bwa kudyombola bânà beetu bàà bakaji to, kadi, mu matuku a kale, bu mukaji mwa kupicila mu cimenga mushindu wùmvwà mumone bakwabo makeelela awu, bavwàle mupanu! Mushindu mwine wùvwà inábànzà awu mubwelemu's, byenze anu bu ne dikoba ndivwà pambelu. Mémè kudikonka mushindu kaayi wùvwà mukaji awu mubwejemu dikasà. Wènda ùpweka ne mùsèèsù's! Pààbì, Bible mmwambe ne: “Mukaji wavwàla civwalu cidì cikumbanyine muntu mulume ùdì cinyangu ku mèsù kwa Nzambi.”

¹³⁰ Ne bintu byònsò bya bleu abi, mu byondokondoko mwònsò mwa mèsù amu, yèyè wìkala muye ku cimenga cya ku ncyàmà kwaka, ngangabuka wa kale awu's mmufwanyine kwikala mumubweje mu lupitaadi, ne mushiye cimenga ku cibola, bwa disaamà kampanda, ne: “Mukaji kampanda mudya kùdì kamunguji kumpala kwa kufwaye.” Ncya bushuwa's. Dìsaamà bu nanku's!

¹³¹ Ne pashiishe wèwè uteeta bwa kwalukila ne kwikala ne nsòmbelu wa cintu kampanda, pashiishe ubènga dikookola dya Evanjeeliyo wa cyena kale wa Nyuma Mwimpè, ne mùvwàbi

mu Dituku dya Mpenta ne byambiibwà bimwebimwe bya bwena bivwàci naabi mwômò amu abi, bwa kutukezula ne kutuvwija bifukiibwa bipyabipya. Twêtù tudi ne mwoyi mu mindidimbi, ne ekeleeziya ùdì mu cikondo cya Laodikiya aci ne: “Mubanji, ncyèna nkengela cintu to.” Mpindyewu, twêtù beena Mpenta katwena mwa kutamba kubingila ba-Baptistes ne ba-Méthodistes to, bwalu lwèsu kalwena mwa kwamba mbidika wa diipikila café mùdiye mufiike ne mishila to, nudi bamanye’s. Pa nanku twêtù tudi benze cintu cimwecimwe aci. Mpindyewu, aci’s ncyà bushuwa.

132 “Nenku, mona, Ndi mwimane ku ciibi nkookola, ne muntu kanà yònsò. . .” Mpindyewu, vulukaayi ne, Bible mmwambe ne Yèyè ùvwa pambelu pàà ekeleeziya, mu eci cikondo, ùkeba bwa kubwelamu. Mpindyewu, kwèna mwa kwela Diyì dya Nzambi mpatà to. Nwamonu anyi? Yèyè ùvwa ukeba bwa kubwelamu, ùsèngeleelangana bwa kubwelamu. “Muntu kanà yònsò ùnzulula ciibi, wàmBweja awu, kaa, Nèmbwelè ne Nèndye nende didya dya diloolo.” Nwamonu anyi? Yèyè’s ùdì ne cintu kampana cidìYe muswe kuyiikila neebe, bwalu kampana bwa bungèndààmùshingà, anyi ndongamu kampana wa lupandu. Yèyè mmuswe kuyiikila neebe. Kadi pàmwàpa wèwè ukààdi mutambe kwela miji mu twitabaayi ne mutambe kupapa, kuyi ucyuka myanda, mu mushindu wa kuyi muswe kuMuumvwa wàkula to. Ncyà bushuwa’s. “Mona, Ndi mwimane ku . . .”

133 Wèwè udi wamba ne: “Kaa, Mwaneetu Branham, mpindyewu anji indilaku kakese tũng. Mémè’s nkààdi mumane kuMubwejamu.” Ee, pàmwàpa udi mwenze anu aci nkaayaaci. Kadi pàmwàpa aci ki cyònsò cyùdi mwenze, anu kuMubwejamu kwajiki. Nudi numona’s, bantu bààbúngì kabàtu. . .Bàtu ne bwòwà bwa meeji mene a iferno, ne mbamanye ne bayaayamu bòbò kabàyi ne Kilisto to. Nwamonu anyi? Nenku nebàmbè ne: “Ee, mémè’s nkaadi muMubwejemu, cya bushuwa, kukaadi bidimu makumi asatu, kukaadi bidimu makumi abidi.” Kadi aci’s ncifwanyine kwikala anu cyònsò cyùdi mwenze.

134 Ambabi tũng bu mémè mwa kulwa kwebe kumbelu, ne kukookola ku ciibi, wèwè kwamba ne: “Bwelaaku, Mwaneetu Branham”? Mémè kubwela. “Kadi shaala mwimanyine anu apa. Kwikadi wàya kubanga kukenketa eku ne eku, ukalakaja mu bintu mu nzubu mwanyì to.” Nwamonu anyi?

135 Mpindyewu, nudika bamanye ne, munda mwa ciibi cya mwoyi wa muntu tudimù ne tuubibambalu tukese tusokome anyi? Kaa, katwena baswe kuciitaba to, kadi mbulelela. Ncyà bushuwa, tudimù ne tuubibambalu tukese tusokome. Eyowa’s, mukalenge. Tutu banange kubiikila. . .Tutu twakidila, mu mwoyi wetu, kadi katwena baswe kuMuvwija Mukalenge wetu to. Katwena baswe kuya mu iferno to, pa nanku ki twêtù abu ne: “Yesu, bwela Wèwè mu ciibi amu, bwa ncilu kuya mu iferno to, kadi Kwèna mwa kwikala Mukalenge wanyì to.”

136 Mpindyewu, *Mukalenge* mbwena kwamba ne “bwena cintu.” Mbwena kwamba ne, paùdi uMubweja bu Mukalenge, Yèyè ngudi ukontonona kantu ne kantu kònsò. Yèyè ùdi kwende kumbelu.

137 Mémè mulwe kwebe kumbelu ne mukookole ku ciibi, wèwè kuyi munswe to, wamba ne: “Umuka ku ciibi cyanyi aku,” s’ndi mufwanyine kutamba kukwanyisha. Wèwè mumbweje ku ciibi, wamba ne: “Kuyi kakalakaja mu bintu to. Shaala mwimanyine anu *apu*. Mpindyewu, udi ukeba cinyi?” Nwamonu anyi? Ndiku mufwanyine kudyumvwa mwakidila bilenga anyi? Ndiku mufwanyine kukuumvwija kendela kaanyi anyi? Nansha kakese.

138 Nenku mushindu awu ki wùdi ekeleeziya leelu ewu, mulunda wanyi. Ki mushindu wùkaadi bantu benda bashaala ngwòwò awu. “Bwelaaku, Mukalenge, kadi mpindyewu, aci, kwajiki. Ngambilè Wèwè cyùdi ukeba.” Nwamonu anyi? Kaa, bwàlà. Mwaba—mwaba wutùdi tupetela lutatu’s ngwòwò awu.

139 Tudi ne cya kuMwakidila bilenga ne: “Mukalenge, bwelaaku mu nzubu mwanyi. Kwòkò nî ncinyi nî ncinyi, kwòkò nî ncinyi nî ncinyi muneemu emu cyùdi Wèwè ukeba, ùdyängàcìlèci Wèwè mwine. Mémè ndi Wèbe. Wèwè udi wanyi. Wèwè udi untwa mushinga. Mfumu munene, Mufuki wa maulu ne buloba, mmunkookwele ku ciibi. Nenku ndi muswe bwa Ubwele, Mukalenge. Mukalenge, ikala Mukalenge wanyi. Ngangàtè. Swaku bwa wènzè naanyi nî ncinyi cyònsò cyùdi Wèwè muswe aci. Cintu cibi kanà cyònsò cidi munda mwanyi aci, sokolola bwalu ne bwalu busokome bwònsò bùdi mu mwoyi wanyi abu. Bwela mu ciibi ne ciibi cyònsò. Nkenkètè mémè yònsò nkòong, Mukalenge, umone ne ncinyi cidi kaciyi cyenda bimpè mu mémè. Ne cyònsò cidi kaciyi cyenda bimpè aci, ucindeeje, Mukalenge. Ùcimànshè pambelu pàà ciibi. Ndi muswe bwa Wèwè wikalè muneemu emu. Ndi muKwakidilemu bilenga, bwa wikalè Mukalenge wanyi. Ncyèna ne dibenesha adi to, Mukalenge. Nkezùlaku mpindyewu.”

140 Mémè nciyi mwa kuMuvwija Mukalenge wanyi mu byònsò to, ncyakuMuunzulwilaku ciibi to, piikàlaYe kàyi mwa kwikala Mukalenge. Ncyènà muswe bwa Yèyè kwikala anu Musungidi cyanàànà to, piikalàbi ne Yèyè kèna mwa kwikala Mukalenge. Mémè nciyi. . .Muntu yònsò mmuswe Musungidi, kadi kàyi muswe Mukalenge to. Mmuswe cintu kampanda, bwa wàmòna mwa kupanduka ku dipiishiibwa dyònsò dya iferno, ne dîbà adi kwikalaye ne nsòmbelu kanà yònsò wudiye muswe kwikala nende awu, bwa kwenzaye cidiye muswe kwenza aci.

141 Nudi bamanye’s, twänjì twendakanaayiku tǔng twenda tunyunguluka mu nzubu wa mwoyi. Nudiku mwa kuntwala bwa tukwabo tusunsa dikumi anyi? Tangilaayi. Monaayi. Twänjì

twendakanaayiku twenda tunyunguluka mu mwoyi bwa katanci kakese.

¹⁴² Cintu cya kumpala, paùdi ubwela mu mwoyi wa muntu, ku luseke lwa dyabalume paùdi ubwela apu, kùdi kaaciibi kakese mwab'awu, ne kadi kabiikidiibwa ne “nsòmbelu wanyi wa mu musosoko.” Mpindyewu, kwèna muswe bwa muntu nansha umwe adyatemu dikàsà to. “Mpindyewu, mèmè muswe kwenza nî ncinyi nî ncinyi, abu mbuntangile. Nènkashààlè wa mu ekeleeziya, ne nēnye muntwamu. Kadi, muyiishi, kungambidiku wèwè cìdì cìkèngèlà bwa mèmè kwenza to.” Kaa, eyowa's. Nwamonu anyi? “Mpindyewu, ndi mumanye ne Bible ùdi wamba Aci, kadi mèmè ncyènà nCiitabuuja to.” Kaa, balumyana wa yààyà! Nwamonu anyi? Dìbà adi, munwàmbì mwine ne Yesu mmufwanyineku kushaala mu mwoyi wa mushindu awu? Nansha kakese. Yèyè ùdi ùbwelamù mbwa kwikala Mukalenge. Ùdi ùbwela, Yèyè ùdi . . .

¹⁴³ Nenu awu—awu nsòmbelu wa mu musokoko awu, kaa, aci's ncintu cinene. Mpindyewu, s'nudi bamanye ne twètù tutu baswe nsòmbelu wetu sungasunga wa mu musokoko. “Twètù baswe kunwaku twala twa mu nsòmbelu ne mwena mutumba, abu's mbututangile. Bu twètù bakaji mwa kuswa bwa kukosa nsuki yetu, s'ki cìdì. . . Aci's ki dyetu dyèsè dya bwena Amerike. Twètù baswe kuvwala tuputulu, abu's mbututangile.” Ee, bwa aci kaayi ncyà bushuwa. “Bu twètù balume mwa kuswa bwa kunwaku twala twa mu nsòmbelu, ne twètù baswe kulekela bakaji beetu benza nanku, kwènàku wèwè ne dīyì nansha dimwe dya kutwambila nansha.”

¹⁴⁴ Kadi Evanjeeliyo mmwambe ne: “Kùcyènji to.” Mpindyewu, ndīyì dya nganyi dīdì dilelela? Nwamonu anyi? Dīyì dya Nzambi's ndīdì dilelela.

¹⁴⁵ Nudi nwamba ne: “Kaa, bushuwa, tudi baswe—tudi baswe Yesu.” Cya bushuwa. Tudi tudyambidila mutùdi Nende, ne byònsò bya nanku awu.

¹⁴⁶ Kadi ndi ndikonka ne bu Dyambwibwa adi mwa kwenzeka, ne dīngà dituku twètù bashaale nkaayeeu, pashiishe tudikonka ne byònsò abi bìdì kwèpi, bu byòbì mwa kwenzeka mu musokoko wa menemene, nudi bamanye's. Nenu ki mwenzekabi nanku, bu mwīvi bufuku. Nwènù's nenwìkalè. . . Makumi citeema ne citeema pa cyabibidi cimwe cyònsò cya mùliyò, mùliyò ne mùliyò wònsò, kabaakumanyaku nansha ne Dyambwibwa dīdì dyenzeka to. Nedìikalè dimane kwenzeka kadi bòbò kabàyikù nansha mwa kumanya kantu nansha kamwe pa bwalu abu to. Yesu ngwákamba nanku. Pa nanku aci cìdì cìcìvwjà cilelela. Nwamonu anyi? Ncyà bushuwa. Nedilwe bu mwīvi bufuku, ne nebàbìbè bàye naabo.

¹⁴⁷ Byenze bu mukanda wūngààkabalà musangu kampanda awu. Mwabilaayi mwine awu ùvwa nganyi apa? Romeo ne Juliet,

anyi cintu kampanda cya mushindu awu, nwamonu's, wàkalwa ne wàkamwangata mu mèbà a bufuku.

148 Ki mushindu wùdì Yesu wenza ngwòwò awu. Pàdì bàà pa buloba badyùpwile anu mu tulu apu, mùdì Bible mwambe amu, cikondo cya Laodikiya, Yèyè neadifinde ne neangate Mukajimusela awu. Dìbà adi, aba bònsò bìikalà babiike ku lufu, bàà mu bikondo byònsò abi, bàvwà mu bikondo abi abu, nebaye bònsò mu Dyulu mu Mukaji-musela.

149 Pashiishe manyooka nealwe. Ekeleeziya neãmbè ne: “Ee, anji indilabi kakese. Mêmè's mvwa ngeela meeji ne kùvwa ne cya kwikala Mukaji-musela kampanda, Dilwa kampanda dya Mukalenge ne Mukaji-musela.”

150 “S'Dikaadi dimane kwenzeka kale.” Nwamonu anyi? “Nwènu kanùvwakù bamanye kantu nansha kamwe pa bwalu abu to.” Nwamonu anyi? “N'Dilwe mu musokoko.”

151 Bwa cinyi? Twètù tudi twamba ne: “Kaa, mêmè's ntu wa mu ekeleeziya. Ndi Méthodiste. Ndi Baptiste. Ndi mwena Mpenta.” Aci kacyena cyumvwija cintu nansha cimwe bwa Nzambi to.

152 Bìdì anu mùdì ngangabuka wàmba ne: “Udi ne kansere, kàkaadi kadye kadiilemu.” Kadi aci—aci kacyena ne bwalu ne disaamà to. Aci's cìdì anu kukapeesha dìnà. N'démon, nwamonu's, “kansere.” Bu wèwè mwa kwamba ne: “Awu nnkuci. Awu nkabangu-nyuunyi. Awu nciminyi cya mushindu kampanda.” Aci—aci—aci kacyena ne bwalu nansha bumwe to, neidici. . . Kadi, nwamonu's, aci kacyena cìkòndopa to. Aci kacyena cìkàshipa to. Cìdì cyamba anu cyanàànà ne ncikampanda.

153 Kwamba anu, wèwè udi wamba ne: “Ndi—ndi mwena Kilisto. Ndi mwena. . .” Pàmwàpa, anu ku dilaka dya mukana patupu. Nwamonu's, nsòmbelu yetu—yetu yìdì yakula ne dîyì dikole menemene mu mushindu wa ne bujaadiki bwetu kabwena nansha buumvwika to; nsòmbelu yetu, cyenzi cyetu, nsòmbelu yetu munkaci mwetu.

“Nebènzè ditabulujà lwà mwab'ewu.”

“Bààdyènzà biine mbanganyi?”

“Ba-Baptistes.”

154 “Kya, twètù katwakwikala naadi bwalu to.” Kadi pàmwàpa Nzambi ní ùdimù ne mukenji bwetu twètù.

“Bààdyènzà biine mbanganyi?”

155 “Première Assemblée, Deuxième Assemblée, anyi—anyi beena Dìnà dya Yesu, anyi beena—beena Église de Dieu, anyi—anyi cintu kampanda.”

“Kaa, ee, twètù—twètù, twètù katùtu mu aci cisumbu to.”

156 Twètù tudi bàna bàà muntu. Muntu ùdikù mwa kudindinga kutapulula bumpyanyi bwa Nzambi anyi? Bòbò abu's bàdì ne

Nyuma Mwîmpè anu munùdi Nende amu, s'mbenze bintu anu bimwebimwe binwakenza panwakaMupeta abi. Bushuwa's.

¹⁵⁷ Kadi nudi numona bwa cinyi ntu munange Beena Kantu-ku-Byanza bàà Evanjeeliyo mu Kaabujima aba anyi? Cìdi cìsebelakù njila kampanda, bwa mêmè kwamba patooke maalu aa, nwamonu's, ngamba ne: "Eci ki Cyôcì aci." Tudi bàna bàà muntu. "Katwena batapuluke nansha. Tudi bônso Mubidi umwepele," nwamonu's, mwâkambà mwedi wa kasàlà.

¹⁵⁸ Mpindyewu: "Kaaciibi kakese kaanyi sungasunga aku, nsòmbelu wanyi wa sungasunga wa mu musokoko awu, mpindyewu, aci's cìdi anu cîmpè. Nêngiikalè cidimba cya ekeleeziya wenu. Nênshaalè wa mu Beena Kantu-ku-Byanza bàà Evanjeeliyo mu Kaabujima. Kadi, mpindyewu, kungambidiku ne bidi bikengela bwa mêmè kupeta Nyuma Mwîmpè ewu ne kutungunuka mushindu ewu nansha." Wamonu anyi? Nsòmbelu wa sungasunga wa mu musokoko nyêyè awu. Nwamonu anyi? Kwadyakupetaku Bukookeshi bwa Yesu wêwè mwikale wenza nanku to. Yêyè neakudimuke anu cyanààna kadi kupatuka ku ciibi aci kuya.

¹⁵⁹ Cyûvwâku wêwè mufwanyine kwenza mu bwalu bu abu ncinyi, bu muntu kampanda, bu wêwè mwa kuya kwa muntu kampanda, kadi kukwambilaye ne: "Imanyina ku ciibi *eku*. Amba bùdi naabu"? Ee, s'udi mufwanyine kwamba ne: "Twasakidila webe," ukùdimuka upàtuka. Nansha Yesu Pende. Cya bushuwa. Ki bwa cinyi ekeleeziya mmushaale, musòmbè mukwate mashika, nwamonu's, anu mushindu wùdiye awu. Kanulekediku Beena Kantu-ku-Byanza bàà Evanjeeliyo mu Kaabujima bàkafika ku aci citupa to.

¹⁶⁰ Paùdi uteeleja Mukenji, ne umvwa dikookola kampanda [Mwaneetu Branham ùdi utuuta bintu pa cyambilu—Muf.], kangula ushiye bwashi wâmbè ne: "Mukalenge, Eci cìdi cyumvwija cinyi?" Paùdi umona muntu kampanda... Tudi ne batentudi bùngì cyanààna. Kadi paùdi umona wa mushuwashuwale!

¹⁶¹ Mutentudi mbwena kwamba cinyi? Ndola wa mafi ùdi umvwija cinyi, paùdi wangula ndola mwikàle wa mafi? Mbwena kwamba ne yêyè awu mmwenzela pa ndola mulelela. Bikengela kwikalè wa mulelela, bwa kwenzabo wa mafi awu.

¹⁶² Pa nanku kùdi Nyuma Mwîmpè mulelela, bukole bulelela bwa lupandu, Nzambi mulelela wa dinanga. Eyowa's. Kwangaciku cintu cya cishaadile nansha cimwe to. To, mukalenge, kùcyênjiku to. Eyo. Ciibi cya musokoko aci. . .

Nebikengele bwa ndwijakaje bwa kujikija biibi ebi.

¹⁶³ Kabidi, kùdi kaaciibi kakese kàà didyumvwa. Kaa, ekelekele! Aku's nkabì. Kabìvwa bîmpè bwa twètù kushaala ntanta mupitepite bule ku aci ciibi to. Kadi wêwè udi muswe kushaala mwimane mu ciibi cyebe cya sungasunga aci, ne

kwamba ne: “Mpindyewu, kùdìdingikù wângambila cintu nansha cimwe to.” Wamonu anyi? “Mona’s, ntu ne dyanyi diditambisha dya sungasunga.” Cya bushuwa, kadi kabìvwa bikengela wêwè kwikala naadi to.

¹⁶⁴ Mvwa muyiishe kaaba aka, abidi adi panshi aa, pa *Mwânà Wa Mùkòòkò Nè Nkuci*. Nenu mwânà wa mukooko, nudi numona’s, mwânà wa mukooko, mukooko, kàtu ne citùye upatula to pa kuumusha cintu anu cimwe, ciine aci mmyòsà. Ki citùye upatula. Kadi yêyè ùtu ujimija makenji ende. Wêwè udi mwa kwangata mukooko kuwela muulu, ne kuwuteeka ka—ka—kapaaya kàà dikoono naaku myòsà pambidi, mushindu ewu, ne kuwukoono myòsà pambidi pajima. Wòwò newushaale anu kacya wàlààla mwaba awu. Wòwò wùtu wùjimija makenji àwù. Bwalu’s nansha twamba, wòwò ngùtu mutoloke myòsà ayi. Nyàwù wòwò, kadi wùtu wùjimija.

¹⁶⁵ Paùdi wambila muntu ne bidi bikengela bwa alediibwe cyakabidi, bìdi bikengela bwa akezudiibwe, ku nsòmbèlu wa mpekaatu. Yêyè, bìdi bikengela bwa alekele kushimangana kwende aku, kwiba, kwibila, ne—ne kuswishisha kwa bantu ku diitabuuya dyende yêyè, ne kutungunuka. Balumyana wa yààya, bamwe bàà kùdibo’s batu bataayika bu cipòmpà; mpindyewu, nwamonu’s, awu’s ncibujibuji, nwamonu’s, yêyè’s neajuule bilumbu. Kadi mwânà wa mukooko wa cya bushuwa neajimije makenji ende.

¹⁶⁶ Ngákambila bainábànzà beetu musangu kampanda, pa bìdi bitàngilà . . . Kabiyi bu ne mvwa mbalwisha to; bòbò’s mbànà beetu bàà bakaji. Kadi ndi ne lukunukunu bwa Ekeleeziya ewu. Pàndi mmona maalu a pa buloba bu Sodoma bibwelamù, díbà adi’s bìdi bikengela ngèlè mbila bwa kubengangana naabi. Kùdi cintu kampanda munda mwa mwoyi wanyi emu cidi cizànyikà mashi, nenku mêmè ngeela mbila. Kanùlondu dikàsà dya Marilyn Monroe anyi dya bamwe bàà ku bakaji abu to. Ikalaayi nwenza maalu bu Sarah wa mu Bible. Nwamonu anyi? Kanuteeci bwa kwikala Mukalenge Mwabilaayi Kampanda to, mukwabo, kunyeema lubilu pa cibumba cya ku cyambilu ne kutungunuka nanku awu, kadi kuteeta bwa kuvwala bilàmbà bu muntu kampanda wa mvwadilu wa kapelu, ne kwenda utetuka ne kujinga bya nanku. Kanwenji nanku to. Tudi ne bikàsà bya cyena Hollywood bùngì cyanàànà mu Mpenta. Ncya bushuwa. Tudi dijinga ne Nyuma Mwìmpè. Mpindyewu, nudi bafwanyine kubenga kunnanga, nudi bafwanyine kubenga kujinga bwa mêmè kwalukila cyakabidi. Kadi mpùngà wa kwamba Bulelela’s nyêyè ewu, ne Bulelela’s ki bwòbù ebu. Buteetaayibi, monaayibi ní kaBwena nanku.

Inábànzà kampanda wakamba ne: “S’ndyanyi paanyi dyêsè dya bwena Amerike.”

Mêmè kwamba ne: “Kadi’s neujimije cyòcì aci.”

167 Kùkaadi cikondo kampanda, mukajaanyi ne mêmè tuvwa tuya ku cisumbidi kampanda cya byakudya mu Indiana, kadi twètù kumona cintu cya pabwaci, inàbànzà muvwale jipè. Cìvwa cintu cya pabwaci cya kacya. Yèyè kwamba ne: “Munanga wanyi, bantu aba ka—kabasòmbèele bimba mu korale anyi?”

Mêmè ne: “Eyowa’s. Eyowa’s.”

“Ee, mbwa cinyi?”

168 Mêmè ne: “Ee, udi umona’s, munanga wanyi, bôbò abu, kî mbàà mu bwetu Bukalenge to,” mûngààkambà, mêmè ne, “bàà mu bwetu Bukalenge.” Mêmè ne: “To.”

169 Mêmè ewu nkaadiku mwenzenze ngendu ya bu mpandanjila, misangu mivule pa buloba bujima. Ntu nsangana, pândi mbwela mu Allemagne, ndi nsangana nyuma wa cyena Allemagne. Pândi mbwela mu Finlande, mùdi nyuma mushiilangane. Pândi mbwela mu Australie, mùdi mukwabo nyuma. Pândi ndwa mu Amerike, mùdi mukwabo nyuma. Nnyuma wa cyena ditunga awu, ne bwònsò bwayi nya dyabulu. Yesu ngwâkamba nanku. Makalenge a buloba ebu ngaa dyabulu. Yèyè ngudi ukontonona bwònsò bwa kùdìwu. Mpindyewu, Yesu ngwâkamba nanku.

“Nanku, nudi numona’s, nnyuma wa cyena ditunga awu.”

“Ee,” yèyè ne, “twètù katwena beena Amerike anyi?”

Mêmè ne: “To, mukalenge. Mu mushindu mushaadile, ki citùdì.”

170 Yèyè ne: “Wèwè udi nganyi?” Mêmè ne... “Ee, kabivwa bikengela bwa twètù kwenza maalu bu beena Amerike anyi?”

171 Mêmè ne: “To, kî ncisumbu cya bakwaciki bàà maala, balwanganyi bàà mvita ya cimvundu, bàdi benza bundu aba to. To, mukalenge. Twètù tudi balediibwe ku Nyuma wa mu Dyulu. Tudi twètù bafumine mwaba wùdì cijila cikezuke, kaciyi katobà, mwaba wùdì Banjelo ne bwakane bisanganyibwa kumpala kwa Nzambi.” Mêmè ne: “Tudi basòmbèle muneemu emu bu ditunga, bushuwa. Aci ncyà bushuwa. Eci nditunga dyetu, citùdì twètù mwab’ewu, munkaci mwa kuteeta. Kadi bwetu twètù mbwa ne: ‘Bukalenge Webe bulwe. Diswa Dyebe dyenzeke pa buloba, bu mùdìdi dyenzeke mu Dyulu.’”

172 Ki bwa cinyi, patùdi balediibwe ku Dyulu, ne mpekaatu yònsò myumusha misabwisha too ne dyamwamwa dya cipòngòpòngò, Nyuma wa Nzambi, Mufuki awu, ngudi ubwela munda mwa mwoyi wetu, ne Yèyè ngudi ulombola wetù ngiikadilu. Katwena tushima, twiba, twibila to. Tudi ne meeji matooke, balulame, twenda bu beena-mwabo bàà ku Dyulu, bwalu ki citùdì patwìkalà balediibwe ku Nyuma wa Nzambi.

173 Ne bààbùngì menemene bàà kutùdì bàdi bapeta cibwejàkàjì, ne—ne bakwata mudimu anu ne tusumbusumbu tukese ne masaluka ne bikwabo, ne babiikila biine abi ne n’Nyuma wa Nzambi. Ki bwa cinyi tudi tutamba kwelakana mutùdì twenza

leelu ewu emu, ndongolwelu mujima wa ekeleeziya. S'bidì byenza bwôwà's. Kadi nansha mùdiku biine byònsò abi, Yesu ùcìdi anu mwimane ku ciibi, mupàtula pambelu.

¹⁷⁴ Kadi, nansha nanku, kùdi ciibi cikwabo cimwepele cìndì muswe kuunzulula, nciibi cya diitabuuja, pashiishe nênjikijê. Bidikù bìpacila ku dikumi ne bibidi bìndì mufunde kaaba aka, kadi nêmbitùpikè. Ciibi cya diitabuuja.

¹⁷⁵ Wêwè mwambe ne: "Udiku mwa kulwa kùdi Beena Kantu-ku-Byanza bàà Evanjeeliyo mu Kaabujima anyi?"

"Cinganyĩ?"

"Evanjeeliyo mu kaabujima."

"Aci's ncibengangane ne dyanyi diitabuuja."

¹⁷⁶ Kùdi Diitabuuja anu dimwe. Neya bushuwa. "Diitabuuja dimwe, Mukalenge umwe, dibatiiza dimwe." Neya bushuwa.

"Mona's, s'ncibengangane ne dyanyi diitabuuja."

¹⁷⁷ Pàmwápa wêwè ngudi kuyi muswe bwa Yesu imane ku ciibi cya diitabuuja dyebe aci. Udi mwibakile diitabuuja dyebe pa twitabaayi kampanda wa ekeleeziya kampanda, dingumba kampanda. Nenu mu mwaba awu ki mùdì diitabuuja dyebe dikadikangile, mu cibambalu kampanda, ne kuyi muswe bwa Yesu udi Dìyì awu alwe to.

¹⁷⁸ "Ku cibangidilu kwakadi Dìyì," mùdì Yone Munsantu 1 mwambe. "Ku cibangidilu kwakadi Dìyì, ne Dìyì dyakadi ne Nzambi, ne Dìyì dyakadi Nzambi. Ne Dìyì dyakavwijibwa mubidi ne dyàkasòmbela munkaci mwetu." Yêyê ùdi Dìyì dya Cyendelele.

¹⁷⁹ Nenu wêwè, dyebe diitabuuja, ndìdì—ndìdì dyàmba adi, ne: "Matuku a bishima akaadi mamane kupita. Ne cintu pààci ne ndyakula dya mu myakulu, ne dyamba dya ciprofeta kacitukù to. Ne lututukutu lùdi ekeleeziya anyi beena Mpenta batungunuke naalu elu, leelu wa Ndaya ewu, cintu bu nanku kacitukù to." Pàmwápa wêwè ngudi mulekele yimwe twitabaayi kacya yàlamata mu ciibi cya diitabuuja dyebe amu.

¹⁸⁰ Bu wêwè mwa kuunzululaku anu ciibi aci ne kulekela Dìyì dya Nzambi dibwela, bwa kwikalaDi Mukalenge webe, wamba ne: "Cidì twitabaayi wàmba nansha ciikàle cinyi. Pìikalàbi ne Bible ngudi mwambe nanku, Wêwè udi Mukalenge wanyi."

¹⁸¹ Udi ne cya kulediibwa cyakabidi. Ne paùdi ulediibwa cyakabidi, dìbà adi udi ne cya kuujiibwa tente ne Nyuma Mwimpè. Twitabaayi nansha yêyê wa bishi, nansha cinyi, cintu nansha cimwe pa bwalu abu.

¹⁸² Udi wêwè wamba ne: "Ee, ndi ngiitabuuja ne Yesu m'Mwànà wa Nzambi." Dyabulu's ùtu witabuuja cintu cimwecimwe aci.

¹⁸³ Bikengela ulediibwe cyakabidi. Bantu bònsò bàtu ne bwôwà bwa Dilediibwa dipyadiya adi. Kaa, ndi mumanye ne wêwè

ngudi udyàmba wèwè mwine awu ne, udi ne Dilediibwa dipyadiipya. Kadi ndi ngeela meeki ne nsòmbelu yetu misangu mikwabo yitu yakula ne dîyi dikole be mu mushindu wa bujaadiki bwetu kabuyiku mwa kuumvwika to. Nwamonu anyi?

¹⁸⁴ Dilediibwa ditu bukooya, nansha dyôdi dyenzèkèle mwaba kaayi. Fwayiku luse bwa cyakwidi eci, kadi dilediibwa dyôdi dyenzèkèle mu cikumbi cya ngulube, ditu bukooya. Dyôdi dyenzèkèle mu cikumbi cya ngombe, ditu bukooya. Dyôdi dyenzèkèle mu cibambalu cya lupitaadi, ditu bukooya. Ne dyôdi dyenzèkèle ku cyoshelu, dîdi bukooya. Nedyènzè ne wèwè ubole, mu ngeelelu webe wèwè wa meeki awu. Nedikufikishe ku diimansha kantu ne kantu kwònsò kàdi . . .Bintu byúvwà kwònsò eku munange ne mwoyi webe wònsò abi, neubilekele bwa wèwè kushiila kaadikookola kakese katekete menemene aku mwaba. Nansha kòkò kiikàle kaacitanda kakese mu disangu.

¹⁸⁵ Twètù mwab'ewu tutu twitabuuja bintu binene. Twètù beena Amerike, tutu baswe bifulu binene, ne—ne mashinyi manene a tudyendelandela, ne mangumba manene, bààbúngì mu twitabaayi, bààbúngì mu dingumba. Byònsò bitùdi twètù baswe bìdi anu bintu binene; kadi Nzambi ùtu paanyima pàà tuntu tukese, tuumèyi tutekete menemene. Mbimbimbì ne mitooyi búngì cyanààna ki bitùdi twètù baswe.

¹⁸⁶ Cidime kampanda kwangataye ditempu mungà musangu, kuyaye mu budimi. Ne paakayaye, divwa dyenda ditondoka ne dituutakanangana ku bintu dyenza mutooyi búngì cyanààna. Pakaavwadi dyalukila, divwa dyenda dipicila mu bikunakuna bimwebimwe abi kadi kadiyi nansha mwa kunyungaku to. Divwa dipàya ne bintu bilenga.

¹⁸⁷ Twètù tudi baswe twitabaayi. “Dingumba dyetu ndidi ditambe bunene. Tudi ne *bikampanda*. Butumbi kùdi Nzambi, tudi bapite musumbà wùdi *apa* ewu. Tudi bapite musumbà wùdi *apa* ewu, ku difuta dya mfranga, ne ku dipeshangana dya mitooto, ne bikwabo byònsò, ya ne watàmba kubweja bantu bapite búngì mu ekeleeziya nganyi.” Ncyèna cilumbu ne aci to. Aci cìdi anu cìmpè. Kadi, cìndi mèmè nteeta kwamba ncyòci eci, kî ng'Acì to, nansha nanku. Bìdi anu bìmpè, kubweja bantu mu ekeleeziya. Eyowa's.

¹⁸⁸ Kadi Yesu wakamba ne: “Pààkayà muntu mukaswishangane ku diitabuuja ne mubweje muntu umwepele mu ekeleeziya,” mwakambaYe, “cyakalwaye ncinyi? Mwànà wa iferno misangu yibidi kutamba mùvwàye pààkabangàye.”

¹⁸⁹ Tutu tuumvwa, mu ndongamu ya Billy Graham. Mwine awu, ncyèna ne cya dyamba bwa kulwisha naaci mutangadiki munene ewu to. Nansha cimwe. Yèyè mmuntu wa Nzambi, ne Nzambi ùdi ukwata nende mudimu. Kadi ùdi usanganyiibwa penyi? Mwamwa mu Sodoma. Nudi bavuluke cifwanyikijilu aci anyi? Kùvwà Banjelo babidi bààkapwekà ku Sodoma, cifwanyikijilu

cyàkambà Yesu ne neciikalè cintu cimwecimwe aci ku Dilwa Dyende.

¹⁹⁰ Kadi umwepele Yèyè wàkashààla ne Abraham, Ekeleeziya musungula awu, mubiikidiibwe pambelu. Monaayi cyàkenzà Banjelo abu nseke yònsò yibidi ayi, dîbà adi kadi nupete Mukenji.

¹⁹¹ Kî ncintu cya pabwaci anyi, cya baamisanjeela babidi abu? Anu menemene cyàkambà Nzambi, mu matuku a ndekeelu, kacya kakùtukù kwanji kwikala muntu pambelu pààpa mu budimi bwa bwambi, mu matuku ònsò a Moody, Sankey, Finney, Knox, Calvin, too ne ku ndekeelu, kakùtukù kwanji kwikala nansha umwe ne dînà dya dijika ne h-a-m, G-r-a-h-a-m to, too ne leelu ewu. Monaayi musanjeela mutumina ekeleeziya wa mmwenekelu wa kwisùkwisù awu, nwamonu's, "taatù wa bisamba."

¹⁹² Mpindyewu, Ekeleeziya wa nyuma kàvwa usanganyibwa mwômò amu to, kacya anu kwònsò aku. Wa beena Mpenta, mu cifwanyikijilu, tangilaayi musanjeela wàkalwa kùdì Ekeleeziya awu awu.

Yèyè wàkasòmba ne wàkayiikila ne Abraham. Yèyè wakamba ne: "Mukajeebe Sarah, ùdi penyi?" Yèyè wàkamubiikila "Abraham." Pààbì's, dînà dyende divwa Abram. KwambaYe ne: "Mukajeebe Sarah, ùdi penyi?" Dînà dyende divwa S-a-r-r-a, mpindyewu dîdì S-a-r-a-h. Yèyè wakabiikila S-a-r-a-h.

Kwambaye ne: "Ûdi mu ntenta, paanyima Peebe apu. Paanyima Peebe apu."

¹⁹³ KwambaYe ne: "Mémè," mupinganyi muleeji muntu, "nèngiikalè mwa kunumwenekela, bilondeshile cikondo cya mwoyi." Nenu Sarah. . . KwambaYe ne: "Sarah waseki bwa cinyi pàNgàmbì cyòci aci apu?" S'ki Yèyè awu.

¹⁹⁴ Bwa cinyi bìvwa bifwanyine kwikala nanku? S'bidì bikengela bwa twètù kupeta nyuma wa bwena awu ùmwènekela Ekeleeziya, nyuma wa ciiprofeta, nyuma wa dijingulula. Kadi pàdiye ubwela, bantu bàdì bamubenga. Bwa cinyi? N'Laodikiya awu. Mbatambe kutupaya ne twitabaayi ne bikwabo mu mushindu wa katùyi mwa kuciitabaku to. Nya bushuwa. Nwamonu anyi? "Ndi mwimane ku ciibi nkookola. Muntu kanà yònsò yèyè muumvwe Dìyì Dyanyi. . ."

¹⁹⁵ "Kaa, dyanyi diitabuuja kadìtu diitaba abi Bintu to." Dîbà adi's udi ne diitabuuja dibi.

¹⁹⁶ Diitabuuja, nudi bamanye's, Diitabuuja dishuwashuwale ne dilelela dya Nzambi, neditwe "amen" ku mulayi ne mulayi wònsò wa Nzambi, Nyuma Mwîmpè mushuwashuwale wetu ewu. Bwa cinyi? Nyuma Mwîmpè ngwàkafùnda Bible. Kî mudìYe wàmba. "Bantu bàà kale, basàka kùdì Nyuma Mwîmpè,

baakafunda Bible.” Nwamonu anyi? Dìbà adi mmunyi mùdì Nyuma Mwîmpè mufwanyine kwikala munda mwebe, kadi kuMuvila? Kênàku mwa kucyenza to.

¹⁹⁷ “Cimwenekelu cya difwana dya Nzambi,” mwàkambà muprofeta, “kadi bafwanyine kuvila bukole bwàdì,” bwa kusuulula balume ne bakaji ku mpekaatu ne bintu bya pa buloba. Nzambi ìkalèku neetu luse. Kaa! Diitabuuja kampanda dya butendeledi dyùdì naadi, didì divila Dìyì dya Nzambi adi, ikala muditole kule naadi. Dìyì dya Nzambi diikalè dilelela. Eyowa’s, mukalenge.

¹⁹⁸ Monaayi. Yèyè mmwambe ne: “Bwal- . . . kwèna mumanye ne udi butaka, mwena dikenga, mupele, mukengeledi wa luse, ne mpofo anyi? Kadi kwèna mucimanye to.” Ki cibadi cidì cyenza ne luse ncyôci aci. Mpindyewu tukàadi tujikija. Ndi muswe bwa nûmvwè eci: “Kwèna mucimanye to.”

¹⁹⁹ Mpindyewu, wèwè mumone muntu mulume ulwa mwab’ewu wenda upweka ne mùsèsù wa munene, wa Stone Street ewu, anyi wùmwe wa ku mìsèsù ya minene eyi, ne muntu awu mwikàle mupele wetu wa menemene ewu mu mushindu wa kàyikù ne bilàmbà pambidi to, ne mwikàle mwena dikenga, mukengeledi wa luse, ne kàyì ne bilàmbà pambidi to, butaka; anyi muntu mukaji kampanda, anu butaka bwetu bwa pulupulu ebu, ne mpofo; kadi kàyì mucimanye to. Mpindyewu, bu muntu mukaji ewu mucimanye, anyi muntu mulume ewu mucimanye, yèyè’s ùvwa mwa kuteeta kukeba mwaba kampanda wa diya kabwelaye, bwa kupetaku bilàmbà. Kadi pàdìye kàyì mucimanye to, dìbà adi wèwè uya bwa kuteeta kumwambila, yèyè wàmba ne: “Endela yebe.”

²⁰⁰ Mpindyewu ncyôci aci menemene cyàkambà Yesu Kilisto ne ekeleeziya wa beena Mpenta neikalè mu matuku a ndekeelu aa, “cimvumvu,” ne neikalè “mubanji.” Twètù’s tudi twamba kwikala babanji anu mùdì (ekeleeziya) yònsò mikwabo amu. Kale wawa, patùvwà mu kaacitanda kakese mwamwa, tuvwaku ne lupandu. Mpindyewu utùkaadi babànde milongo minene ya kuulu mushindu ewu ewu, ne bantu búngì kabuyi kubala, ne bintu binene bilenga, dya leelu tudi panshi anyi tudi pa kazubu? S’anu mùdì bakwabo bònsò abu amu’s. Nenku Yesu ngudi mwambe nanku.

²⁰¹ Kadi munkaci mwa biine byònsò abi, Yèyè mmutungunuke anu ne kukookola. [Mwaneetu Branham ùdì ùtuuta bintu pa cyambilu—Muf.] “Muntu kanà yònsò (muntu-nkààya) yèyè muumvwe Dìyì Dyanyi, ne muunzulule ciibi, Nèmbwelè. Ne Nèndye nende didya dya diloolo, ne yèyè neadye Naanyi.”

²⁰² Ki kutùyaayà koobeka nkwòkò aku. “Butaka, mpofo.” Mpofo, mpofo anu wetu wa menemene ewu, mpofo mu nyuma. Wèwè kuyiku mwa kumwambila kantu nansha kamwe to.

203 Nudi bamanye's, twètù tutu bakoleshiibwe mu bulanda bwa tudikoonya mashi bituuka, mu Kentucky mwamwa. Kakwányi mulume ùvwa cilembi, mwine awu cilembi uvwabo—uvwabo bamanye bikole menemene. Nenku yéyè ùvwa ne ciibidilu cya kutwa buluwà bwa nyama ya nshimba. Ncyèna mumanye nwènù bàdi apa aba ní. . . Kakwena màyi búngi bukumbane mu Arizona emu bwa kwikalamu nyama ya nshimba to, ngeela meeji. Kadi bôbò—bôbò bàdi naawu, kwòkò aku, bàvwa ne nyama ya nshimba. Bàvwa batwa buluwà bwa nyama ya nshimba.

204 Mbanganyi bàdi bamanye cilembi cya nyama ya nshimba? Ee, tangilaayi beena Kentucky mwaba ewu's. Ekelekelee! Eyo. Ee, ndi ndyemvwa anu bu ne ndi mufwanyine kwanji kuvuula kazaku kaanyi aka mpindyewu kadi kuyiishaku katanci kakese kàà dîbà. Mvwa mwenze anu bu ne mbanswike myonji ndambu's, kadi ngàdyūmvùku bilenga be patùdi twakulangana apa. Mâawù wa yààya màawù!

205 Mbanganyi bàdi bamanye mààtèlâ a bisoosa? Hum! Hum! Ee, Tony, twasakidila. Mémè's ndi mwalukile kwetu kundela's, twamb'eku twamb'eku. Uh-huh. Uh-huh. Eyowa's. Abi mbîmpè be. Ekelekelelee!

206 Dyampà dya bukula bwa matalà, musabu wa nsèkè ya matalà, kaa, ekelekele, nkunde ya màdeesù, ne mabeji mabishi a tuunèpà's we! Nukaadiku babidyè anyi? Kaa, ekelekele! Aci's, mpindyewu, tudi bilenga mpindyewu. Eyowa's, mukalenge. Abi's mbîmpè.

207 Nenku kakwányi mulume awu ùvwa ne ciibidilu cya kukwata nyama ya nshimba, kadi ùvwa mwa kwengulula mafuta ààyi awu. Ne ciine. . . Bàvwa ne kakopo kakese. Tuvwa ne ciibidilu cya kulama kakopo kakese kàà lwevenya aku.

208 Maman ùvwa ne kàvwàye ukosolola naaku màmpà, kaa. . . ne kakopo kàà lwevenya aku. Nenku ùvwa wènza màmpà manene menemene awu. Uvwa mufwanyine kukwata lwà kumutu eku, kadi ntaku umata; kadi kwelamu musabusabu wa nsukaadi wa mamvwa a tumbùyi, ne cipese cinene cya manteka menzela kumbelu. Bivwa bütamù bwa kacya. Mbifwanyine kwikala bîmpè mpindyewu mene. Kadi mbampe musabusabu wa nsukaadi wa dilobelela mu dinda emu. Pa nanku, nudi bamanye's, cintu bu cyôci aci's ncifwanyine kwikala cîmpè cya dikema.

209 Kadi maman ùvwa ne ciibidilu cya kwangata miine mafuta a nyama ya nshimba awu, ne ôwò—ôwò àvwa bwanga bwa lwôndapu kwetu kumbelu aku bwa màsaamà ônsò, ôwò awu ne mafuta a liniment. Nenku yéyè. . . Bu twètù mwa kutapika mputa, bàvwa batupongolwela mafuta a liniment awu, ne màyi a térébenthine. Nenku dîbà adi patùvwà tupeta cintu kampanda citùsaama, tuvwa tunwa mafuta a nyama ya nshimba awu.

210 Nenku tuvwa ne kaacibambalu kakese kamwepele, ne kùvwa kaa—kaacisàsà. Bìvwa bikengela bwa twètù kwikala tubànda ku—ku cisàsà aku, mushindu *ewu*. Dikunji dya cibàndilu òvwa dyaenza ne tuumici twànà. Nenku twètù bânà tuvwa tulaala kuulu aku pa mààtèlâ a bisoosa. Ne pashiishe kuulu kwa mààtèlâ a bisoosa awu kùvwa bulaalu bwa masàlâ, mààtèlâ a masàlâ. Ne pashiishe mabaya a dilamika ku bimanu mateekiibwe mu bukênkè bwa ngondo, ne mushindu awu àvwa mwa kwenza disòsò. Nenku—nenku nêjè ùvwa mwa kubwelelapu, pa nanku ùvwa uteeka cipese cya ntenta lwà pamutu peetu apu, bwa kupangisha nêjè mwa kutuyiila mwísù bufuku, musùmbà wa ba-Branhams bakese awu. Nenku tuvwa mwa kwikala babidi lwà ku mikolo, ne babidi lwà ku mutu, ne babidi lwà pankaci. Tuvwa anu ne mishindu yònsò ya bulààlàvì ayi, tubungulukanganamu byenze bu tungulube tukese, kadi biikàle tulaminangana luuya lwa pambidi muntu ne mukwende.

211 Ku musangu ne ku musangu, umwe wa kutùdi ùvwa mwa kuumuka mwinshi mwa kiine kantenta aku, pàvwà lupeepa lwa mashika mwa kutuuta, nenku tuvwa tupeta cimpumpu, ne tuvwa tupeta lutatu ne mu mèsù. Kadi, nudi bamanye's, bintakanyi bya bikwatakane abi binwenza mu mèsù. Maman ùvwa ubibiikila ne “bintu.” Wàmba ne: “Bintu binwenza mu mèsù.”

212 Ee, mvwa mbiika mu dinda. Ne maman ùvwa wàmba ne: “Billy, tuùlukà. Dìbà dyàkànyì dya kuya mu kalaasa.”

Kadi mèmè ngamba ne: “Maman, s'ndi ne bintu mu mèsù. Ncyèna ne mushindu wa kumona to.”

213 Nenku, Humpy, mwakunyaanyi wa balume, yèyè ùvwa mwa kubiika. Dìnà dyende ùvwa Edward, kadi tuvwa tumubiikila ne Humpy, anu bwa kwela bilele cyanàànà. Nenku ùvwa wàmba ne: “S'ndi ne bintu mu mèsù.”

214 Mvwa mwa kuumvwa kakopo kàà kale kàà mafuta a nyama ya nshimba aku bàkèèla pa dicyuwa. Mààmù ùvwa uèngulula ònsò. Nenku maman ùvwa mwa kubànda ku bibàndilu aku, nenku ùvwa ùfiita ne ùkàmata pa mèsù apu. Nenku, nudi mwa kubenga kuciitabuuja kadi, bintu abi bìvwa byumuka. Mafuta a nyama ya nshimba awu àvwa bwanga bwa lwòndapu lwa màsaamà ònsò a mèsù àvwa makwatakane ne bintu abi awu.

215 Kadi, ndi nzwambila ne, nkulwe cipòòlò cya mashika cipicile mu ekeleeziya, kadi mafuta a nyama ya nshimba kaàkwenzakù cintu to. Kadi Yesu mmwambe ne: “Ndi nkubela bwa wèwè kusùmba bwanga bwa mèsù,” Nyuma Mwìmpè. Wèwè udi wenda utamba kulwa mpofo, ng'ekeleeziya awu's, mu mushindu wa yèyè—yèyè kàyikù mwa kumona Nzambi to. Ùdi yèyè umona anu bulongolodi bwende. Ùdi umona anu cidiye pende mwa kumona mutudi tumona kumpala kwetu emu. Kàtukù yèyè utangila kwaka naka ku Dilwa dya Mukalenge dikaadi diseemene adi

to. Mafuta a nyama ya nshimba kaàkwikalaku ne dikwacisha nansha dya kànà to.

216 Kadi bwanga bwa Nyuma Mwîmpè nebutabaje mèsù ebe, nenku udi mwa kufika ku dimanya ne, Bwikadi bwa Yesu Kilisto. Ne Yèyè ùdi umwèumwè awu makeelela, leelu, too ne kashidi. Yèyè ùdi Nzambi, ne Ùdi mwa kwondopa mèsù ebe awu ne bwanga bwa Nyuma Mwîmpè Wende. Neupwe mwoyi ne wèwè uvwa Méthodiste, anyi Baptiste, anyi Unitaire, anyi Binitaire, anyi Trinitaire, anyi mwena Église de Dieu, anyi Nazaréen, anyi Pèlerin de la Sainteté. Newikalè mwena Kilisto, mulediibwe cyakabidi, wa mu Bukalenge bwa Nzambi.

217 Wèwè udi mufwanyineku kwikala cintu kampanda. Kabyakukengela bwa wèwè kuteeta kwamba ne: “Ee, ndi ne cya kwenza *cikampanda*” to. Kùdi cintu kampanda munda mwebe amu cìdì cikusukuma bwa wèwè kucyenza. Dijinga dinene dya mu mwoyi webe amu dìdì dikusaka ku disambila. Dinanga dya Nzambi dìdì dituuta nkoka mu muntu wa mu kandondo keebe kàà munda awu, mu mushindu wa kuciya mwa kushaala mupuwe to. Masangisha a milombo àdi anu atuuta nkoka afumina munda mwebe amu, byenze bu màyì apatuka mu mushimì wa màyì a kazeze.

218 Mvwa ne ciibidilu cya kupicila, pâmvwà mukubi wa nyama ya mwitu bidimu byàbúngì, mvwa mpicila pabwìpi ne mushimì munene wa kale. Nenku wùvwa wùfúkuka mu mushindu *ewu*. Mémè—mémè kusòmbela panshi, ku mushimì awu dîngà dituku, kwamba ne: “Udi ne disanka búngì nanku dya cinyi?” Kaa, màyì awu avwa ne cyashima be. Nenku mvwa mwa—mvwa mwa kubikulaku ndambu wa màyì awu. Mémè kwamba ne: “Udi ne disanka búngì nanku dya cinyi? Udi ne disanka bwalu tùlulù tùtu tùnwa màyì ebe anyi?”

Bu wòwò mwa kwakula, nunku mmwambe ne: “To.”

“Mbwalu tushà tùtu tùnwa màyì ebe anyi?”

“To.”

“Mbwalu mémè ntu nnwa màyì ebe anyi?”

“To.”

219 “Udi ne disanka búngì nanku bwa cinyi? Cìdì cyènza ne wikalè ufúkuka nanku ncinyi?”

220 Bu wòwò mwa kwikala mwakule, nunku mmwambe ne: “Kì mmémè udi ufúkuka to, Mwaneetu Branham. Ncintu kampanda paanyima panyi apa, munkaci mwa kunsaka, ciikàle cyènza ne ngìkalè mfúkuka dìbà dyònsò.”

221 Tutu tudyenzeja twètù biine bwa kwenza bintu. Kadi pàdì Nyuma Mwîmpè munda amu, ku dinanga dya Nzambi nkutùdì tubyenza. “Bwanyì mémè kwikala ne mwoyi n’Kilisto, ne kufwa mmakàsà mapeta,” mwàmbilè Pòlò. Cya bushuwa. Mpindyewu Dilaabiibwa dya bwanga Bwende adi dilweku ku mèsù ebe aku.

222 Bwa kujikija, ncyênà ne meeji a kunulama kaaba aka too ne munwacyoka bikole to. Nansha byôbi ne mmusangu wanyi wa kumpala, anyi musangu mwibîdi, wa kwikala neenu, nwamfwilaayiku luse piikalâbi ne ndi mushaale neenu ntanta mupitepite bule. Nanku, lekelaayaaku njikije, mu kwamba kwa bwalu ebu.

223 Mu Sud mwamwa, tuvwamu ne mwaneetu kampanda wa bafiike mwena Mpenta, yêyè ùvwa bulelela musadidi mulelela wa Kilisto. Kùvwa mwaneetu wa bakaji kampanda mukulakaji wa Bafiike wâkalwa mu ekeleeziya amu. Ne yêyè ùvwa muujiibwe tente ne Nyuma Mwîmpè, ne ùvwa muntu wa ngiikadilu mulenga wa dikema. Kadi ùvwa ne bayende; bayende awu ùvwa mwabilaayi mwîmpè mukulakaji. Dîna dyende ùvwa. . . Bâvwa bamubiikila ne Gabriel. Kadi twêtù tuvwa tumubiikila anu ne Gabe, mu cikoso.

224 Ne pa nanku katùvwakù mwa kumufikisha ku diditeeka mu njila wumwe ne ekeleeziya to. Yêyè—yêyè kâvwakù anu muswe kulwa mu ekeleeziya to. Ki cìvwâyè wâmba. Kaa, kadi nsongaalume ya ku nzubu wa manayi a billard kùvwâyè utamba kajembelela aku, yivwa yamba ne: “Wawa’s wùvwa mmusumbâ wa bansantu babunguluki bàà mu malaba, ne bôbô biine kabeena ne bwa nsongo to.” Nanku cintu cimwepele cìvwâ cikèngelâku bwa Gabe kwenzaye cìvwa cya ne, mu dyalumingu mu dinda, wângata dikombo dyende dya kunaya naadi billard adi ùpweka mutangile ku nzubu wa manayi a billard aku, anyi cintu kampanda, ne ùyakù pamwe ne nsongaàlùmè ayi.

225 Kadi mukajende ùvwa munsantu mudifile ne kasuki. Nanku ùvwa ùya mu ekeleeziya, ne ùvwa ùsambila, ne wâmbila mpaasata ne bônso abu bwa kusambidilabo Gabe. Bwalu, mu bulelela, munda mwa mwoyi wende, ùvwa muntu mulume mwîmpè. Nanku ùvwa wenza kaamudimu kende kakese kuntwaku, kakese mu disangu, kaamudimu kakese kâà dilaabilangana dya bwanga ku bisabaata. Ùvwa mwa kukenkesha bisabaata ku dibilaaba dya bwanga, ne ùpeta mfwalanga bûngî bukumbane bwa diya kanayaye naayi billard. Mona’s, ùvwa ùya ùkanâya billard. Pa nanku kâvwakù yêyè muswe bwa kuditeeka mu njila wumwe ne Evanjeeliyo to. Kadi mpaasata. . .

226 Mukulumpe Gabe ùvwa munange bikole kutwa buluwâ. Pa nanku, mpaasata ùvwa cilembi, yêyè pende, pa nanku ùvwa mwa kwangata Gabe bwa kuyabo mu buluwâ. Pa nanku, dimwe edi, paanyima pâà dituku dijima dya batambakane mu cipeela ne mu bisensè, bàkaavwa mu njila bààlukila pambelu mu mapingaja amu. Nanku—nanku bâvwa ne nyama yâbûngi yivwâbo baase mu mushindu wa ne bakayambula ne lutatu. Bâvwa baase tûlulù ne nyuunyi, byônso abi byambula pambidi pajima, benda baya. Ki kumatabo mu kajila kampanda kâà ciibidilu kâà kale pâvwâbo benda bâbânda apu. Kubândabò too ne ku lusongo lwa kakuna

aku, pashiishe kupwekabo mu kaacimenga kakese amu. Mùvwa mmu diisambombo, ne dībà dikaavwa dyenda dibwela.

227 Ki kwenzekabi ne mpaasata akenzakane. Kàyikù umvwa mukulumpe Gabe wàmba bwalu nansha bumwe to ntanta mule. Ki kutangilaye eku ne eku. Nenku Gabe ùvwa mutangidile pa makaaya ende apu, mutangile kùvwà—kùvwà dībà munkaci mwa kubwela aku, pàkaavwàdi disambuka ntwangeenu wa dyulu ne buloba wa ku wesete. Ki mpaasata kutapa dīsù paanyima. Kumonaye ne Gabe kàvwa wàmba bwalu nansha bumwe to, kadi mwikàle anu kacya watangila paanyima pàvwàye wenda wenda apu. Ki pa nanku mpaasata kutungunukaye anu ne kwenda kuya munda mwa ndambu wa tusunsa.

228 Ki paanyima pàà katanci, cyanza cinene cifiike kumulengaci pa dikaaya. Kadi mmwenze anu ukudimuka anyi, mu dipapuka amu, mukulumpe Gabe kacya anu wamutangila mu mpala, ne binsonji bimupwekela pa matama, bizololoka mushindu *ewu*. Kwambaye ne: “Mpaasata, mu dinda wèwè neunsangane anu ku cibasa cya badidi bàà myadi aku.” Yèyè ne: “Pashiishe nènkùmùkè buludi, nye kasòmbela ku luseke lwa mukajaanyi wa lulamatu awu. Ne pashiishe nènshaalè wa mu ekeleziya amu too ne pàmbiikilà Nzambi bwa kwalukila kumbelu.”

229 Kadi mpaasata, mu bushuwa bwa bwalu, kukùdimukayè munkaci mwa dikacila. Kwambaye ne: “Gabe, mèmè mvwa muswe, ne mwindile, ne mujingèjinge, ne musambilesambile, munda mwa bidimu, bwa cyòci eci.” Yèyè ne: “Gabe, kwajiki anyi?”

230 Yèyè ne: “Eyowa, mpaasata, bwalu abu mbutuuke. Kadi, ndi muswe paanyi Nyuma Mwìmpè awu. Nenku nèndwe ku cibasa cya badidi bàà myadi aku mu dinda, nenku nèmMupetè, bwa cyanàànà mèmè nèmfwilè anu kwòkò aku.”

231 Kwambaye ne: “Gabe, ndi—ndi ngaanyisha cyòci eci.” Yèyè ne: “Kadi ndi muswe nkukonkeku cintu kampana, Gabe. Ndiyiisha kaayi dīndiku muyiishe, dīdī dikusonsole bwa kwenza ciine eci? Ndi muswe kumanya ne ndiyiisha kaayi dīndī muyiishe, mpa cinyi pāmvwà muyiishe. Anyi, mmusambu kaayi wūdi korale mwimbe, wūdi—wūdi mukusonsole bwa wèwè kwangata dipangadika bunene nunku, Gabe?”

232 Kadi mukulumpe wa Bafiike awu kutangilaye mpaasata, ne kwambaye ne: “Mpaasata,” mwakambaye, “ncya bushuwa ne ntu mwanyishe diyiisha kanà dyònsò dyúkaadī muyiishe.” Yèyè ne: “Ntu—ntu mwanyishe byònsò byúkaadiku mwambe, mpaasata.” Yèyè ne: “Ntu mwanyishe musambu mulenga kanà wònsò wúkaadiku korale mwimbe. Kadi,” mwakambaye, “mpaasata, kacivwa ng’aci to.” Yèyè ne: “Udi mumanye’s, mvwa mutangile dībà dyadya pàvwàdi dyènda dibwela kuntu kwaka apu. Wèwè ukàadiku mumanye ne, dyanyi dībà ne dyebe wèwè,

dìdi pààdi dyènda dìbwela, bukênkè bwa mubidi wetu bwenda buumuka anyi?” Kadi aci’s ncilelela.

²³³ Ncilelela kaaba aka mu dinda emu, balumyana. Dîbà dìdi dyènda dìbwela, dìbwela mu mwoyi webe wa panu ne mu wànyi. Ne dìdi dyènda dìbwela dilleja ndekeelu wa bikondo, mu dishidimuka. Kwàdì nkujike. Nenku Yèyè mmwimane ku ciibi, [Mwaneetu Branham ùdi ùtuuta bintu pa cyambilu—Muf.] ukookola, ùjinga wàmba kufwa, mwindile. Dikookola dikese adi, cintu kampanda munda mwa mwoyi webe amu ciikàle cyàmba ne: “M’Mémè. Dyünzùlùlăku mpindyewu.” N’Yèyè awu. Gabe yèyè wakateleja cyôci aci, ki yèyè kukùdimuka.

²³⁴ Kwambaye cikwabo cintu ne: “Mpaasata,” mwàkambàye, “s’udi mumanye ne mémè ncitu mwena ndudi to.” Yèyè ne: “Ncivwakù mufwanyine kwasa cintu nansha cimwe to. S’udi mumanye ne ncivwakù mufwanyine kwasa cintu nansha cimwe. Kadi tangilaaku anu nyama eyi, mikumbane bwa kutudiisha mémè ne mukajaanyi too ne lumingu lùdi lùlondà elu.” Ki kwambaye ne: “Udi mumanye’s, ncyênàku mwa kwasa kantu nansha kamwe to, kadi,” yèyè ne, “Yèyè ngwayimpeeshi ewu.” Yèyè ne: “Meeji mmamvwile anu ne: Yèyè ùdi ne cya kwikala munnange, cyanàànà Yèyè kàvwakù mufwanyine kwikala mwîmpè kùndi mushindu ewu to.” Kacya wèwè ukaadiku mufike ku dyumvwa aci anyi?

²³⁵ Mu Inde, leelu ewu, bânà bakese, ndi mumanye, mbalaadika mu mùsèèsù, ne tuumafù tûle, tuubinyàngànyàngà twabo tukese atu tupweke mushindu ewu, bafwa ne nzala. Maamù mukese awu usengeleelangana bwa kwangatabo ewu, kadi pààkù kwikàle bakwabo binunu. Mu mapingaja kampanda, bàdi balwa babambula, mu tulaalu twa dyambwila babeedi ne bikwabo, ne baya naabo mwaba wùdi lombe ne babeelamu. Kakwenaku bya “Yone 14” abi to. Badya cintu kanà cyònsò, mashinda a panshi aa, bizubu bya mici, anyi cintu kanà cyònsò cìdìbo mwa kwenza aci.

²³⁶ Twètù’s tudi tupumuna, mu bipanza byetu bya diimanshila bukooya, búngì bukumbane bwa kubadiisha. Twètù’s nyewu tudi basòmbè apa mu dinda emu, tufuta bu ndola umwe ne citupa nanku bwa ndambu wa byakudya kaaba aka. Ne tudi ne bilàmbà bìmpè. Tudi twendela mu mashinyi malenga a tudyendelandela. Tudi basòmbèle mu nzubu mulenga. Nwènù beena kantu-ku-byanza aba, midimu yenu’s mmisonge nkèlè, bu mùndi nnuumvwa nufila majaaniki. Nzambi’s mmudilleeje mwîmpè kunùdi. Kanwenaayiku mwa kufika ku dyumvwa ciine aci anyi?

²³⁷ Mona’s, Yèyè’s mmununange. Nudi bamanye nanku anyi? Nenku’s ki bwa cinyi dikookola adi dilwalwa ne: “Ndi mwimane ku ciibi nkookola. [Mwaneetu Branham ùdi ùtuuta bintu pa cyambilu—Muf.] Nenku muntu kanà yònsò yèyè muumvwe Dîyi

Dyanyi, ne muunzulule ciibi, Nêmbwelè mùdiye amu, ne nêndye nende didya dya diloolo, ne yèyè neadye Naanyi.”

²³⁸ Mpindyewu, kaaDìyì kakese, katekete kàdì kakookola ku ciibi cya mwoyi webe aku, s’nkafwanyine kukookola misangu bûngì cyanààna too ne mùdiku mwa kushaala kakese menemene mpindyewu mene. Kadi twikalaayi anu ne meeji matooke, ne meeji matooke kùdì Nzambi ne kutùdì twètù biine, anu bwa kasunsa kamwe cyanààna. Kaadikookola kakese aku, munda menemene amu, kàdì kambè ne: “Mbîmpè bu mêmè mwa kwelela njila yanyi mikàlu. Bivwa bîmpè mêmè kwikala mushiilangane. Mbîmpè bwa mêmè kudyakaja. Ndi mumanye ne kùdì bintu munda mwanyi emu. Pândi ntangila apa, pândi nkenketa nsòmbelu wanyi ku Dìyì edi, ndi mmona ne ndi mupiile mu maalu àbûngì.” Kenzakanaku, mona mùdìbi bîmpè; bwîmpè Bwende mbùdì bukookola ku ciibi abu.

²³⁹ Citùdì benze nansha ciikàle cinganyi, nansha twètù benze mpekaatu bûngì munyi, nansha twètù mwa kwikala baCibenge bishi, nansha twètù mwa kwikala bambe ne: “Netücyënzè pashiishe,” Yèyè, ùcìdì anu munkaci mwa byònsò abi, ùkookola. [Mwaneetu Branham ùdì ùtuuta bintu pa cyambilu—Muf.] “Nenku mulume anyi mukaji kanà yònsò yèyè muunzulule anu mwoyi wende, Nêmbwelè ndye didya dya diloolo.”

²⁴⁰ Twǎnjǎàyi kumona tǔng cìdìYe muswe mu dinda emu, s’mmwòmò’s, patùcìdì twinyika mitu yetu apa? [Katupa kàà mukaba wa mēyì munda mutupu—Muf.]

²⁴¹ “Kaa, Yesu wanyi, ndi muKunange, ndi muKunange. Kaa, bwa ngàsà bwa kutamba kuKunanga, Mukalenge.”

²⁴² “Nkaacintu kaayi aku kakese kàcìdì anu katungunuke ne kungambila, munda mwa mwoyi wanyi, ne: ‘Ndi ne cya kutamba kusemena pabwîpì ne Yesu?’ Ncinganyi aci?’ Udiku muswe kuCyunzulwila ciibi, mu dinda emu anyi?

²⁴³ Mpindyewu, ne mutu wònsò mwinyika, ne dîsù dyònsò dibwita, bu nwênù mwa kuswa. Munda mwa mwoyi webe amu, ikala ne meeji matooke a menemene, anu kasunsa kamwepele cyanààna.

²⁴⁴ S’ngwèwè awu ne kaadikookola kakese kàà mushindu awu aku ku ciibi cyebe. Nênsambilè, anu katanci kakese cyanààna. Nenku, ne meeji matooke, s’udi muswe kumanya ne kantu kakese kàà kakàyi kumvwika mu nsòmbelu webe aku nkanganyi, kaùdì muswe kulekela—kulekela kàbwelamu aku. Udiku muswe bwa Yèyè kubwelamu anyi, mu dinda emu? Amba ne: “Mwaneetu Branham, sambilaku bwa mpete diitabuuja ne ngàsà anu bwa kukangula mwoyi wanyi ne kuCilekela cibwela. Ndi muswe kumanya ne Cyôcì eci ncinyi, cìdì cìkookolà ku ciibi cyanyi eci. Ndi mumanye ne kùdì cintu kampanda munkaci mwa kukookolaku. Pàmwápa cidì ndwendu lwa sheemàsheemà. Pàmwápa mmudimu wa bwambi mushiilangane. Pàmwápa

mbwa kudilambula mêmè mwine. Pàmwápa mbwa kupeta Nyuma Mwimpè.”

²⁴⁵ Swaku wèlè cyanza cyebe muulu kùdi Nzambi, wámbe ne: “Ki mêmè ewu, Mukalenge.” Nzambi akubeneshe. Ki cyôci aci. Kaa, bidi anu myaba yônsò nàka. “Ndi ne kaadikookola kakese ku ciibi cya mwoyi wanyi.” Ngeela meeji ne, mbya pa lukama makumi asambombo anyi makumi mwandamutekete bya bantu.

Ne mitu yetu miinyika.

²⁴⁶ Mpindyewu, Taatù wetu wa mu Dyulu, “Kùdi Mpokolo,” bu mùdi mwedi wa kasàlà mwambe, “udi mùle tente ne Mashi makoka mu mijilu ya Emanuwele, mùdi bangènzàmpèkààtù binyija mwinshi mwa Nkwaka awu bajimija dikeji dyabo dyônsò dya dipiila. Mwívi uvwa upunga ne lufu awu wàkasànka pa kumona Mpokolo awu mu dituku dyende, ne swaku bwa mwômò amu mêmè paanyi, nansha mùndi mukooyike bu yêyè amu, nkupule mpekaatu yanyi yônsò.”

²⁴⁷ Mpindyewu, Taatù, tudi ne kusakidila bwa bantu aba. Ne bamwe bàà kùdibo, kakùyi mpatà to, bàtu bafilefile majaaniki a bwena Kilisto bwabo kukaadi ntanta mule, kadi nyewu baapeci di—ditwishiibwa dilelela dikumbane bwa kwela byanza byabo muulu. Ambaaku tûng, Mukalenge, bu ne kabavwa nansha ne ditwishiibwa bwa kwela byanza byabo muulu? Dìbà adi’s mbapicishe cikondo cya bupikudi. Patùdi twela meeji bwa mwaba awu, wùdi musuuka mulalakanyi mwa kulalakana e kuya kabwela too ne mu mîdimà, ne mwikàle mpofo mwena dikenga kadi kàyì mucimanye to. Ne yêyè awu ùmvwa dikookola dya Nzambi, kadi ùCìbungamija misangu búngiyi too ne ndekeelu wa byônsò kaCìciyikù cikookola kabidi to. Kadi ùbàkula twitabaayi kampanda anyi cintu kampanda, ne ùshààla ne mwoyi ku cyôci matuku ende ônsò, bwa kudisangana mwediibwe màyi ku makàsà ku Dituku dya Cilumbulwidi.

²⁴⁸ Ndi ne kusakidila, Mukalenge, bwa bantu aba bàdi baswe kwela byanza byabo muulu bwa kwamba ne: “Ikalaku naanyi luse, Mukalenge. Bwelaku mu mwoyi wanyi, Mukalenge Yesu, ùdibuulùlèku Wèwè mwine kùndi leelu ewu. Nenku nènKupèèshè nsòmbelu wanyi. Ki mêmè ewu. Kwòkò cintu kampanda mu mêmè emu cidi kaciyi cijaalame to, Mukalenge. . . Kadi ndi ntangila nsòmbelu wanyi sungasunga, ne ndi mmona ne mùdi bintu bibi búngì cyanàànà, dìbà adi mbwejeko mu nzubu Webe munene wa difwimbilangana awu ne—ne mfwimbèku, ne umushaku mu mêmè emu byônsò bya maalu a pa buloba ne bìdi kabiyi bineemeka Nzambi. Nenku ndi nKusakidila, Mukalenge, bwa mùndi nciyi mukafike mu mwaba wa mêmè musambuke mukàlù awu, wà ne, wèwè muwusambuke kuyiku mwa kwalukila kabidi to bwa kashidi; kubungamija Nyuma wa Nzambi bwa musangu wa ndekeelu, ne mpindyewu kakuciyi kabidi mushindu nansha mukese to, wa dyalukila.” Bu Yudààsà

Mpongoloki ne bakwabo abo, yêyè wâkapàanyisha Mukalenge wende ku binjanja bya mfranga makumi asatu awu. Nenku twètù tudi tucyenza leelu, bwa dimanyika, ne diditacisha dya mu meeji bwa maalu a pa buloba, ne bwa malongolodi ne mangumba a ntendeleelu, ne twitabaayi. Tudi twètù tuMupaanyisha anu ku cintu cyònsò nâka.

²⁴⁹ Éyi Mukalenge, fwilaku myoyi ya meeji matooke luse. Ndi nyilombela yôyi ayi, Mukalenge. Kaa, ne byònsò bidì munda mwanyi, ndi ndomba luse lwa kùdi Nzambi. Nenku ngumvwilèku, Mukalenge, ngumvwilèku. Ne swaku bwa dijinga edi dinene, pamwe ne diitabuuja, bàmanyèku ne Nzambi ngudi mwakule ne myoyi yabo. Nzambi ngudi wenza maalu aa. Nenku swaku bwa ciibi cya mwoyi cyunzuluke mpindyewu mene, ne Yesu abwelemu ne alwe Mukalenge wa nsòmbelu, mwikàle upatula maalu ònsò a pa buloba ne ubavwija bifukiibwa bipyabipya mu Kilisto Yesu.

²⁵⁰ Ondopaku bàdì bàsaamà, Mukalenge. Pa kumona ne kùdi lutatu búngì cyanàànà, ndi mbasambidila, Taatù, bwa ne, mpindyewu Ngangabuka munene alengeku kabidi buntu bwabo bwa mubidi abu, ne abuvwije nzubu Wende, cisòmbedi Cyende, mùdìYe mwa kwolola byanza Byende ne kulenga pàdì anu dibiiikila dyanzeka. Kaadibiikila kakese, kapeepele kàà mu mwoyi aku, nenku Ngangabuka munene ùdi munkaci mwa mudimu. Enzaku nanku, Mukalenge. Tùmvwilèku leelu ewu. Beneshaku bònsò bàdìpu aba. Mu Dìnà dya Mukalenge Yesu Kilisto, mmutùdì tulomba nunku. Amen.

²⁵¹ Mpindyewu, ne mitu yetu miinyika, ne didipwekesha dya menemene, bituulubituulu, twìmbàayi musambu wa kale wa ekeleeziya ewu wa ne: “Ndi muMunange, ndi muMunange bwalu Yêyè wakannanga kumpala.” Ne ikàlà mwitabuuje mpindyewu ne ciwâlòmbu aci, ne kaadikookola kakese kapolobebe kàvwà ku mwoyi webe aku, Yesu neabwelemu mpindyewu. Ne ditalala dyònsò, patùdì tuwimba apa.

Ndi muMunange, ndi muMunange
Bwalu Yêyè wakannanga kumpala
Ne wàkampetela lupandu
Pa mucu wa Kalvariyo.

²⁵² Mpindyewu, ne mitu yetu miinyika. Wêwè udi muswe kuMwitaba bu Mukalenge munda mwa mwoyi wèbè awu ne: “Mukalenge, umùshàku byònsò mpindyewu. Ne kubangila pa dîbà edi, ndi ngenza didilambula kùdì Wêwè pa meesa aa, Mukalenge, bwa ngaatwilangana Neebe ku Didya dinene dya Dibanji. Ndi ndambula nsòmbelu wanyi kùdì Wêwè, mu dinda emu, pa nanku ngambùlwishèku, Mukalenge wanyi. Pìikalàbi ne ncyènà mwanji kupeta Nyuma Mwîmpè to, nênditwe mu dikeba too ne pààbwelà Nyuma Mwîmpè mulelela ne kukezula nsòmbelu wanyi, ùmwija cifukiibwa cipyacipya mu Kilisto

Yesu. Ndi nKulaya leelu ewu, Mukalenge, pândi ngenza didilambula kùdì Wèwè pa meesa aa apa. Mu Dîna dya Kilisto, ndi ndaya ne nêncyênzè, pândi ngeela byanza byanyi muulu apa.”

²⁵³ Mpindyewu, elaaayi byanza byenu muulu, ne imbaayi ne mèsù enu mabwita mpindyewu.

Ndi . . .

Udiku mwa kudilambula mpindyewu anyi?

. . . muMunange

Bwalu Yèyè . . .

²⁵⁴ Nzambi, ikalaku ne luse. Taatù, tangilaku byanza ebi, ne enzaku nanku, mu Dîna dya Yesu.

Ne wàkampetela lupandu

Pa mucu wa Kalvariyo.

²⁵⁵ Mpindyewu ndi muswe wolole cyanza dyamwamwa dya meesa ulabulanganeke ne muntu kampanda ku cyanza. Amba ne: “Nzambi akubeneshe, mwena lwendu. Ndi ne disanka dya kwikalaku neebe kaaba aka, mu dinda emu.” Ncya bushuwa. Bantu bônsò anji sambakanaayi, ba-Méthodistes, ba-Baptistes, beena Katolike, ba-Presbytériens. “Nzambi akubeneshe. Nzambi akubeneshe.” Mayiisha misangu mikwabo àtu atapa ne asaamangana, kadi tudi—tudi baswe ku—kudyumvwa bîmpè bwàWù.

²⁵⁶ Mpindyewu, Nzambi akubeneshe, mwaneetu wa balume. Nzambi akubeneshe. Nzambi akubeneshe, mwaneetu wa bakaji. Nzambi akubeneshe, mwaneetu wa balume, Nzambi ikalè neebe. Nzambi akubeneshe. Bilenga be. Akubeneshe, Mwaneetu Tony.

²⁵⁷ Mpindyewu twanjaayi kwimanyinaku kuulu katanci kakese cyanààna, ne byanza byetu ne myoyi kùdì Nzambi, Taatù wetu.

²⁵⁸ Twitabaayi yônsò—yônsò, yônsò—yônsò, mpindyewu biikàle twitabuuja. Mpindyewu, wèwè mumane kusambila, wavuluka ne, Yesu mmwambe ne: “Paùdì usambila, witabuuje ne udi upeta ciwâlômbu aci, nenku necikupeebwe.” Nudi nuciitabuuja anyi? Ambaayi ne: “Amen.” [Disangisha didi dyàmba ne: “Amen.”—Muf.] “Ndi ngiitabuuja ne ndi mpeta cîngâlômbu aci. Ngâlâmbulu nsòmbelu wanyi kùdì Yesu Kilisto. Ne kubangila ku dituku edi, kubangila apa, ndi ngambilamu cya bushuwa, Nzambi. Nêngëndè kumpala Kwebe too ne mwalwaci cintu cilelela, too ne mûngàâlwa mêmè yônsò musokoka mu Kilisto Yesu.”

²⁵⁹ Mpindyewu, mulombodi wa misambu ùdi kaaba aka anyi? Tubangaayaaku musambu wa kale wa ngàsà awu wa ne: “Diitabuuja dyanyi nditangile Kùdì, Wèwè Mwànà wa mukooko wa ku Kalvariyo, Musungidi wa kùdì Nzambi.” Ndi ndikonka mwaneetu wa bakaji mwena ku pyànò ní ùdikù mwa kutupeesha cyònà aci. Mbanganayi bàdì bamanye musambu awu? Juulaayi . . .

Mpindyewu, twĩmbàayi aci ne mēyì manangula ne: “Dĩtabuuja dyanyi nditangile Kùdì, Wēwè Mwànà wa mukooko wa ku Kalvariyo.” Bònsò cyapamwe mpindyewu.


Dĩtabuuja dyanyi nditangile Kùdì,
Wēwè Mwànà wa mukooko wa ku Kavariyo,
Éyì Musungidi wa kùdì Nzambi;
Mpindyewu ngumwìlèku pàndì nsambila apa,
Umushaku mpekaatu wanyi yònsò,
Kaa anyishaku bwa kuumukila ku leelu ewu
Mēmè yònsò ngìikalè anu Webe.

Twinyikaayi mitu yetu mpindyewu.

Pàndì ngendela mu nyongolo wa mĩdimà wa
njila mibwelakane wa panwapa apa,
Ne pàdì lutatu lupaasalala lunnyùngulukila,

Vuluka ne, udi ukatwilangana ne maalu a pa buloba mpindyewu.

Wēwè ikala Mulombodi wanyi; (Teelejaayi.)
Tumina mĩdimà diyì bwa yandamuke muunya,
Kupula bwôwà bwanyi bwònsò,
Kundekediku mpambuka
Nsemena kule neeBe nansha.

²⁶⁰ Tùwĩmbilaayaakù mu matama. [Mwaneetu Branham ne disangisha baabangi kwimbila *Dĩtabuuja Dyànyì Nditàngile Kùdì* mu matama—Muf.] 

CIIBI MUNDA MWÀ CIIBI LUA63-0223
(A Door In A Door)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo mu dinda, mu matuku 23 a ngondo mwibîdi, cidimu cya 1963, bwa mpwilu wa Buloba bujima bwa Bwobumwe bwa Beena Kantu-ku-byanza bàà Evanjeeliyo mu Kaabujima ku Ramada Inn mu Tucson, Arizona, U.S.A. Ndyumusha pa mukaba wa mēyî ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maaluu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org